

**ՏԱՐԵՐԱՅԻՆ ԱՂԵՏՆԵՐՆ ՈՒ ԵՐԿՆԱՅԻՆ
ԵՐԵՎՈՒՅԹՆԵՐԸ ՎԻՄԱԳՐԵՐՈՒՄ**

Մաս երրորդ: Երաշտ, մորելի*

Բանալի բառեր – վիմագիր, երաշտ, ծես, պաշտամունք, մորելի, հացի սղություն, ցորենի ու կորեկի թանկություն, պատերազմ, երկրաշարժ, սով, եկեղեցի, խաչքար:

Մուտք

Հայերեն վիմագրերում բնական աղետներին ու երևույթներին նվիրված սույն հոդվածաշարի նախորդ երկու մասերում¹ փորձեցինք ընդհանրացնել երկրաշարժերի, Արեգակի խավարման, ծովի ալեկոծման և դրա հետևանքով նավաբեկության ու ջրահեղձման վերաբերյալ մեզ հայտնի հիշատակությունները, ուստի շարունակելով թեմատիկ շարքը՝ ներկա հրապարակմամբ անդրադառնալու ենք միջնադարյան սկզբնաղբյուրներում և ժողովրդական ավանդության մեջ երաշտի ու մորելիների կտրուկ ակտիվացման մասին պահպանված վկայություններին ու դրանց հետևանքային դրսևորումներին, մասնավորապես՝ հացի սղությանը, թանկությանն ու սովին, որոնք արտացոլվել են նաև վիմագրական հուշարձաններում:

* Հոդվածն ընդունվել է տպագրության 10.03.2022: Հետազոտությունն իրականացվել է ՀՀ ԿԳՄՄՆ գիտության կոմիտեի ֆինանսական աջակցությամբ՝ 20TTSH-005 ծածկագրով գիտական թեմայի շրջանակներում:

¹ Տե՛ս **Հարությունյան Ա.**, Տարերային աղետներն ու երկնային երևույթները վիմագրերում. մաս առաջին: Երկրաշարժ, «Վէմ», Եր., 2022, N 1, էջ 178-196, **նույնի**՝ մաս երկրորդ: Արեգակի խավարում, ծովի ալեկոծում, «Վէմ», 2022, N 3, էջ 168-196:

Ա. Երաշտ

Մատենագրության մեջ, ինչպես նաև ազգագրական ու բանահյուսական նյութերում բազմաթիվ վկայություններ են պահպանվել եղանակային անոմալիաների, բնակլիմայական փոփոխությունների, հատկապես՝ սաստիկ շոգի, ջրի սակավության, սերմերի չորացման, մկների, մորեխների ու թրթուրների ակտիվացման և առհասարակ երաշտի մասին, որն աղբյուրներում հիմնականում «երաշտութիւն» ձևով է հիշատակվում: Դեռևս Ս. Գրքում Երուսաղեմը պատուհասած երաշտի հետևանքները Երեմիա մարգարեն այսպես է մեկնում. «Եւ գործ երկրին պակասեաց, զի ո՛չ եղեւ անձրեւ ի վերայ երկրի.... Եղինք ի վայրի ծանն, եւ թողին զծնունդս, զի ո՛չ գոյր բանջար: Եւ ցիռք (վայրի էշ - Ա. Հ.) ի դաշտս ծծեցին զօդս իբրեւ զվիշապս. եւ սորեցին (տկարացան - Ա. Հ.) աչք իւրեանց, զի ո՛չ գոյր խոտ» (Երեմիա, ԺԴ. 4-6):

Բազմաշնորհ հայրապետ **Ներսէս Շնորհալին** իր «Ողբ Եդեսիոյ» պոեմում աստվածային պատիժ է համարում տարերային աղետներից կարկուտը, եղյամբ, անձրևների պակասն ու երաշտը, ինչպես նաև մորեխների, մկների, մլակների բազմացումն ու դեղնացավը. «Եւ կամ բերումն կարկտին եւ եղեման խստագունին, / Կամ անձրեւաց գալ անչափին, կամ՝ անխոնաւ խիստ երաշտին, / Կամ՝ բազմութեան յոյժ մարախին (մորեխին - Ա. Հ.), կամ՝ դալընկին (դեղնացավին - Ա. Հ.) եւ մնինային (մլակին - Ա. Հ.), / Եւ կամ՝ մկան զազրագունին ի յեռացումն անդաստանին»²: Մարդկությանը ժամանակ առ ժամանակ պատուհասած բնական աղետների գրեթե նույն շարքն է վկայված նաև **Մխիթար Գոշի** հայամավուրքային վարքում, որում ներկայացվում է վարդապետի տեսիլքը Տիրոջ գերեզմանի մոտ: Մխիթար վարդապետի թախանձանքին ի պատասխան՝ Տերը նրան շնորհում է «....սկուտեղ Գ. (3) նշխարաւ և փոքրիկ սկաւառակ մի՝ լի բաժակաւ»³ ասելով, թե «....ուր և հասանեն դո-

2 **Ներսէս Շնորհալի**, Ողբ Եդեսիոյ, առաջաբանը եւ քննական բնագիրը՝ **Պ. Խաչատրեանի** եւ **Ս. Մկրտչեանի**, «Մատենագիրք Հայոց», հատ. ԻԱ., գիրք Ա., Եր., 2018, էջ 192:

3 «Վարք եւ պատմութիւն **Գոշին Մխիթարայ**», տես **Մինասյան Թ.**, Ուտիքի գրչության կենտրոնները, Եր., 2020, էջ 202:

քա, ոչ լինի սով երկրին այն, և ոչ մորելս, և ոչ թրթուր, և ոչ ժանկ⁴, և մինենայ, և ոչ տալուկ, և ոչ ջորեակ, և ոչ մուկն, և ոչ կարկուտ, և ոչ մահ, և ոչ գերութիւն»⁵, այլ կլինեն միայն «...առատութիւն և փարթամութիւն երկրի, և առողջութիւն ամենայն ցաւոց»⁶:

Չոր եղանակը, ձյան ու անձրևների տևական դադարը, դրանց հետևանքով նաև մորելիների, թրթուրների և վնասատու այլ միջատների աննախադեպ տարափը մարդկության պատմության մեջ ուղեկցվել են հիմնականում հացի սղությամբ, դրանով պայմանավորված՝ նաև թանկացումներով, սովով ու համաճարակներով⁷: Հայ իրականության մեջ երաշտի դեմ հաճախ ծիսակատարություններ⁸ ու աղոթքներ⁹ են արվել: Օրինակ՝ «Մաշտոց» ծիսարանն ունի «Աղաւթք ի վերայ Երաշտութեան. Անձրել լինի» խորագրով միավոր, որն ի Տեր ուղղված աղոթք է. «Դո՛ւ, Տէր ամենայնի, զքո ինքեան գթութիւնդ բարեխաւս ունելով, անձրել ըստ կամաց պարգեւեայ ժառանգութեան քում, եւ զբազմամեղութիւնս մեր անտես արա, եւ զանձրելս քո առաքեա՛, որք պետս ունին եւ խնդրեն...»¹⁰: Համանման է 1631 թ. Կաֆայում (Ղրիմ) երաշտի դեմ պայքարը ներկայացնող գրավոր հիշատակությունը, երբ մարդիկ «...վասն երաշտու-

4 Ժանգը մակաբույծ սնկերից առաջացող հիվանդություն է, որը տարածվում է հատկապես հացաբույսերի վրա (տես **Մալխասեանց Ստ.**, Հայերեն բացատրական բառարան, հատ. 2, Եր., 1944, էջ 139):

5 **Մինայան Թ.**, նշվ. աշխ., էջ 202:

6 Նույն տեղում:

7 16-րդ դարավերջին և 17-րդ դարասկզբին գրանցված եղանակային անոմալիաների, ինչպես նաև թուրք-պարսկական պատերազմի հետևանքով առաջացած ճգնաժամի համատեքստում 1606-1609 թթ. մեծ սովը հանգամանորեն ներկայացրել է պատմաբան Միքայել Մալխասյանը (տես **Մալխասյան Մ.**, Ժողովրդագրական գործընթացները Հայաստանում 16-րդ դարում – 17-րդ դարի առաջին կեսին, Եր., 2020, էջ 176-208): Սովի և դրա մատենագրական վկայությունների մասին տես նաև վերջերս հրատարակված մեր հոդվածը **Հարությունյան Ա.**, Սովի վկայությունները ԺԵ. դարասկզբի մատենագրական աղբյուրներում, «Բանբեր Սատենադարանի», Եր., 2021, N 32, էջ 224-233:

8 Դրանց մասին տես, օրինակ, **Լալայան Ե.**, Բորչալուի գաւառ. Ջրի պաշտամունք, տարրերի և ֆիզիկական երևույթների պաշտամունք, «Երկեր», հատ. 3, պատ. խմբ. **Վարդունյան Ռ.**, Եր., 2004, էջ 195-196, 204-208, **Լիսիցյան Ստ.**, Ջանգեզուրի հայերը, Եր., 1969, էջ 126-134, **Բոդյան Վ.**, Երկրագործական պաշտամունքի տարբերջանը, «Երկրագործական մշակույթը Հայաստանում», Եր., 1972, էջ 433-501, **Հայրապետյան Թ.**, Անձրևաբեր և անձրևախափան ծեսերի երկհակադիր ընկալումների շուրջ, «Պատմաբանասիրական հանդես», Եր., 2004, N 3, էջ 217-227, **Papoli Yazdi M.-H., Jalali A.**, Rituals to Appease the Providence to Send Rain During Drought Periods, “The Circle of Ancient Iranian Studies”, Akhbar, Daily Newspaper, N 54, էջ 186-210, http://www.cais-soas.com/CAIS/Celebrations/drought_ritual.htm. (մուտք՝ 28.02.2022), **Հովսեփյան Ռ.**, Հայաստանի եզդիների «Բուկա բարանե» («անձրևի հարս») և մյուս անձրևաբեր ծեսերը, «Էջմիածին», Ս. Էջմիածին, 2017, N Ա., էջ 114-146:

9 Տես «Հայ հնայական և ժողովրդական աղոթքներ», աշխատությամբ՝ **Ս. Հարությունյանի**, Եր., 2006, էջ 146:

10 «Մայր Մաշտոց», հատ. Ա., գիրք Ա., ըստ հնագույն երկաթագիր ծեռագրերի եւ համեմատութեամբ Աստուածաշունչ մատենի, բնագրական եւ կանոնացանկային յաւելածովք, աշխատասիրութեամբ՝ **Գ. Տէր-Վարդանեանի**, Ս. Էջմիածին, 2012, էջ 416, ԼԵ. (37):

թեան համար չաւք արաք»¹¹, այսինքն՝ ծնրադիր աղոթել են, իսկ, օրինակ, Սյունիքում «երաշտի ժամանակ մատաղ էին մորթում»¹² կամ կաթնով եփում՝ «կաթնավով մատաղ», որն ունեցել է երկու գործառույթ՝ անձրևաբեր և անձրևախափան¹³:

Երաշտից կամ նմանօրինակ այլ աղետներից պաշտպանվելու համար բնակավայրերի բարձրադիր վայրերում նաև խաչքար-կոթողներ են կանգնեցվել, որոնք **Ցասման խաչեր** են կոչվել, քանզի դրանց «....հիմնական գործառույթը բնական աղետների կանխումն էր»¹⁴: Դեռևս Դավիթ Անհաղթի հեղինակած՝ կենսատու սուրբ խաչին նվիրված ներբողի մեկնության մեջ Ներսես Շնորհալին տերունական սուրբ նշանը բնութագրում է իբրև «Նահատակաց վիգ եւ վահան, / Վտանգելոց աւժընդական....»¹⁵, այսինքն՝ վտանգի, աղետի ժամանակ օժանդակող, օգնող, պաշտպանող, իսկ խոստովանական աղոթքում խաչի մկրտության ու օրհնության կարգը նկարագրելիս հատկանշում է խաչին շնորհ ու գործություն պարգևելու քրիստոնյաների խնդրանքը Տիրոջը, «....որպէսզի գդես հալածեսցէ, և զախտս ի մարդկանէ սրբեսցէ, և ցասումն, որ վասն մեղաց մերոց իջանեն ի վերուստ, դադարեցուցէ....»¹⁶: Այս երևույթը վավերացնում է նաև **ՀՀ Տավուշի մարզի Այգեձոր գյուղից** ոչ հեռու՝ Աղջկաբերդ ամրոցից հյուսիս, ճամփեզրին գտնվող և 11-12-րդ դդ. թվագրվող խաչքարի վիմագիրը (նկ. 1ա, բ): Երբեմնի 2 մ բարձրությամբ կոթողից բեկորներ են մեզ հասել: Վերջերս դրանք տեղում լուսանկարել է հնագետ Տիգրան Ալեքսանյանը: Մասամբ պահպանված արձանագրությունը վկայում է խաչքարը դժվարությամբ ձորից բերելու, հանդիսավորությամբ օրհնելու և ահեղ օրերին ի բարեխոսություն առ Քրիստոս կանգնեցնելու մասին:

11 **Խաչատուր Կաֆայեցու** տարեգրությունը (XVII դ.), «Մանր ժամանակագրություններ», հատ. Ա., կազմեց **Հակոբյան Վ.**, Եր., 1951, էջ 219:


12 **Լիսիցյան Ստ.**, նշվ. աշխ., էջ 129:

13 Տես **Հովսեփյան Ռ., Աբրահամյան Հ.**, «Կաթնավով մատաղ»՝ անձրևաբեր և անձրևախափան ծես Սյունիքում, «Լրաբեր» հաս. գիտ., Եր., 2022, N 3, էջ 352:

14 **Պետրոսյան Հ.**, Խաչքար. ծագումը, գործառույթը, պատկերագրությունը, իմաստաբանությունը, Եր., 2008, էջ 264:

15 **Ներսես Շնորհալի**, Ներբողեան կենսատու սուրբ խաչին առ ի սրբոյ հաւրէն մերմէ Դաւթ ասացեալ, առաջաբանը և քննական բնագիրը՝ **Ա. Մելքոնեանի**, «Մատենագիրք Հայոց», հատ. ԻԱ., գիրք Ա., էջ 556:

16 **Կիրակոս Գանձակեցի**, Պատմություն Հայոց, աշխատասիրությամբ՝ **Կ. Մելիք-Օհանջանյանի**, Եր., 1961, էջ 140:



**Նկ. 1ա, բ. Ահեղ օրերին ընդառաջ կանգնեցված խաչքարի արձանագրությունը. 11-12-րդ դդ.
(լսնկ.՝ Տ. Ալեքսանյանի, 2022 թ., գրչ.՝ Ա. Հարությունյանի, 2023 թ.)**

**...ՏԱՓԻՆ ԱԽԵՏԱՐԱՆԻՍ՝ ... /
... ՁՈՐԻ ԲԵՐԱՔ ԱՇԽԱՏՈՒԹՅԱՄԺ ԶԴԽԱՆ/ԶՍ,
ԱՂԻՐՀՆԵՑԱՔ ՀԱՆԴԻՍԻԻ, ԲԱՐԵ՛/ԽԱԽՍ ԱՌ-ՔՐԻՍՏՈՅ՝
ՅԱՀԵՂ ԱԽՈՒՐՆ, ՈՐՔ ԵՐԿՐ՛/Պ՛ԱՂԵՔ...¹⁷:**

Դեռևս 19-րդ դարավերջին վիմագիրը տեսել և ընդօրինակել է Ս. Էջմիածնի միաբան Մակար եպս Բարխուդարյանցը, որի հաղորդմամբ՝ խաչքարը՝ «կիսատ», իսկ վիմագիրը թեև տեղ-տեղ եղծված, սակայն ամբողջական տեսքով է եղել. «...ուրեամբ ողորմեալ, ես ... Կիրիկէի, զԱբասայ աւագան է... որդեկիր եւ զտէր Յովհաննէս ե...սի արձան շին... իյո... տափին աւետարան... ի ձորի բերաք աշխատութեամբ խաչս կանգնեցաք հանդիսիւ, բարեխաւս առ Քրիստոս Յիսուս յահեղ աւուրն դատաստանի»¹⁸: Հասկանալի է, որ վիմագրում հիշատակվում են Տաշիր-Ձորագետի թագավորության գահակալներ Կյուրիկե Բ-ն և նրա որդիներից Աբասը (նրանց անունները վկայված են նաև սույն հոդվածի վերջին վիմագրում), որոնց ապրած ժամանակաշրջանով էլ կարելի է թվագրել կոթողը՝ 11-12-րդ դդ.:


1935 թ. նախկին Շամշադինի շրջանի վիմագրական գիտարշավի ընթացքում արձանագրությունը մասնակիորեն փաստագրել է նաև հնագետ-վիմագրագետ Կարո Ղաֆադարյանը՝ ներկայացնե-

17 Ղաֆադարյան Կ., Շամշադինի 1935 թվի հնագիտական գիտարշավը, «Էջեր հայոց միջնադարյան մշակույթի և պատմության», հատ. 5, Եր., 2007, էջ 301: Հմմտ. [Շահինյան Ա.] Հայաստանի միջնադարյան կոթողային հուշարձանները. IX-XIII դարերի խաչքարերը, Եր., 1984, էջ 63:

18 Մակար եպս Բարխուդարեանց, Աղուանից երկիր եւ դրացիք. Արցախ, Եր., 1999, էջ 327:

լով վիմագրի ոչ ամբողջական, սակայն առավել ճշգրիտ վերծանությունը (տե՛ս վերը), իսկ 1972 թ. արված իր դաշտային գրառումներում այն հիշատակում է նաև բանասեր-բանահավաք, ծագումով այգե-ծորցի Իսահակ Չանգլյանը՝ նշելով կոթողի չափսերը՝ 2.0x1.0x0.40 մ, և այն, որ կոթողն ընկած ու երկատված է¹⁹: Վերջինիս հաղորդմամբ՝ այս խաչքարի մասին ավանդություններ են պահպանվել²⁰, որոնցից մեկը փոքր-ինչ այլ տարբերակով հիշատակում է նաև բանագետ Արամ Ղանալանյանը, ըստ որի՝ Աշոտ Երկաթն իր զորքով ամրացել է Տավուշ բերդում ու դիմադրել արաբներին: Օգնության հասնող տեղացի աղջիկներից մեկն իր հյուսերով մի մեծ քար է վերցրել ու բերդի գլխից գցել թշնամու վրա: Սրանք ահից փախել են, իսկ քարի անունը մնացել է **Աղջկաքար**²¹:

Շատ ավելի որոշակի է պատմական Հայաստանի Բզնունիք գավառի Արծկե գավառամասի **Առնջկուս գյուղի** գերեզմանոցի խաչքարերից մեկի արձանագրության բովանդակությունը, ըստ որի՝ 1515 թ. ողջ երկրամասում երաշտ է եղել (նկ. 2ա, բ):



Նկ. 2ա, բ. 1515 թ. երաշտի մասին վկայող խաչքարը. Բզնունիք, գ. Առնջկուս

(լսնկ. և գրչ.՝ Ս. Կարապետյանի, 2017 թ.)

ԹՎ[ԻՆ] ԶԿԴ. (1515), ԷՆ ԽԱՐԻՆ, ՈՐ ԾԱՐԱՍ ԵՐԵՐԿԻՐՆ ԽԱՐԱ²²:

19 Տե՛ս **Չանգլյան Ի.**, Շամշադին. պատմական տեղեկություններ, Եր., 2011, էջ 31:

20 Տե՛ս նույն տեղում, էջ 31-32:

21 Տե՛ս **Ղանալանյան Ա.**, Ավանդապատում, Եր., 1969, էջ 61, N 165:

22 **Կարապետյան Ս.**, Հայաստանի պատմություն, հատ. Գ., Արծկե, Եր., 2017, էջ 75, արձ. բ:

Ակնհայտ է, որ խաչքարը կանգնեցվել է ոչ թե ննջեցյալի հոգու փրկության ու բարեխոսության համար, ինչպես ընդունված էր, այլ երկիրը տարերային աղետներից, տվյալ դեպքում՝ երաշտից հեռու պահելու, հետևաբար նաև անձրևի տեղալու համար²³, քանի որ ծառավ, այսինքն՝ չոր, երաշտ տարին ողջ երկիրը (թերևս գավառը) աղետի էր հասցրել:

Անդրեաս սրկ. Եվդոկացու ժամանակամերձ մի հիշատակության համաձայն, սուլթան Սելիմ Ա-ի և շահ Սեֆիի բանակների միջև Չալդրանում (Վանի նահանգ) 1515 թ. տեղի ունեցած ճակատամարտից (ստույգ ժամանակը՝ 1514 թ. օգոստոսի 23) բացի, «ի թվին ԶԿԴ. (1515) ...կարկուտ անկեալ յերկնից հիանալի. և եղև սղութին հացի, որ քիլակն եղև Լ. (30) օթմանի...»²⁴, այսինքն՝ Վանի նահանգում կարկուտը ոչնչացրել է հացահատիկը, ինչի հետևանքով հացի (ալյուրի) պակաս ու թանկություն է եղել:

Սրբազան կոթողների պաշտամունքը բնության արհավիրքների դեմ կենցաղավարել է նաև հետագայում: Ազգագրագետ, բանահավաք Գարեգին եպս Սրվանձտյանցի բնորոշմամբ՝ նմանօրինակ կոթողները Ցասման խաչ էին կոչվում, «...վասնզի երբ տարածամ ձյուն կամ կարկուտ տեղա, բերքերուն վնասե, երբ մարախն (մորել-խը – Ա. Հ.) ու թրթուրը բույսն ու կանաչը գոսացընեն, երբ երաշտություն լինի, երբ ցավ ու մահ պատահին մարդոց և անասնոց, երբ երկրաշարժ լինի, և ինչ վնաս, որ պատահի երկրին, այն որ մարդոց ըրած չէ. Աստուծո ցասումն կը համարին. և այդ ցասման դեմն առնելու համար Քրիստոսի խաչին պատկերը կը բարձրացընեն այսպես երկնքից առջև, որ պատուհասիչ հրեշտակը պատկառի խաչեն, և Աստված հաշտվի»²⁵: Պատմական Բագրևանդ գավառի նկարա-

23 Բնական աղետների դեմ կանգնեցված խաչքարերի մեզ հայտնի օրինակներից են նաև Տաթև գյուղին հարակից Պետրոսախաչի խաչքարը, որի ստորին մասը կանգնեցված է բլրի գագաթին, իսկ վերին կեսն ընկած է լանջին՝ ջրի մոտ, որի վրա անձրևաբեր ծես է կատարվում (տես **Hovsepyan R.**, On the Rain-Related Rituals of Tatev Village, Armenia (Ethnographic field-notes), «Լրաբեր» հաս. գիտ., 2018, N 3, էջ 347-356, **Հարությունյան Ա.**, Պետրոսախաչի նորահայտ արձանագրությունը, «Էջմիածին», 2018, N Թ., էջ 81), և Վրաստանի Քվեմո Քարթլիի տարածաշրջանի Էնագեթի և Արդիսուբանի գյուղերի միջև գտնվող 1455 թ. խաչքարը, որի վիմագրի համաձայն՝ այն կանգնեցվել է իբրև բարեխոս առ Քրիստոս՝ անդաստանի (հանդ, դաշտ) պահպանության համար. «Կանգնեցաւ խ(ա)չս / բարեխաւս առ Ք(րիստո)ս / վ(ա)ս(ն) անդաստ(ան)իս մերոյ: / ԶԴ. (1455) թվ(ի)ն: Տ(է)ր, Ա(ստուա)ծ, Յ(իսու)ս, Ք(րիստո)ս» (ըստ Նիկիտա Իվանովի տրամադրած լուսանկարի, 2023 թ.):

24 **Անդրեաս սարկավազ Եվդոկացու** ժամանակագրությունը (XVI դ.), «Մանր ժամանակագրություններ», հատ. Ա., էջ 156:

25 **Սրվանձտյանց Գ.**, Գրոց ու բրոց, «Երկեր», հատ. 1, Եր., 1978, էջ 80-81:

գրության համապատկերում նման տեղեկություններ է հաղորդում նաև բանասեր, բանահավաք Սարգիս Հայկունին, երբ նշում է, որ «Բագրեւանդայ շատ մի գիւղերու մօտ՝ բարձր դիրքի վերայ, տեսած եմ մեծ խաչ արձաններ, որոց գիւղացիք Սասման խաչ կասեն, որ լինելու է Յասման խաչ, արդէն երբ երաշտ լինի, զոհ կը մատուցանեն՝ եզ, կով, ոչխար և այլն....»²⁶: Քաջբերունու հաղորդմամբ էլ՝ Վայոց ձորի Գնիշիկ գյուղի բարձրադիր Դալի (խելագար) խաչ կոչված մատուռը տեղացիների համար ուխտավայր է դարձել, որտեղ մատաղ են անում, աղոթում ու խնկարկում, իսկ 1853–1855 թթ. Այար (Ագարակաձոր) գյուղից Մկրտիչ քին. Մարտիրոսյանցը մորեխի անխնա բազմացումը կանխելու համար ծնրադիր աղոթել է Դալի խաչի հին խաչքարերի առաջ, որից հետո «....մորեխը դարձել է այլ կողմի վրա, և քահանան շինում է մատրան ներկա շինությունը»²⁷:

Գրեթե նույն գործառույթն են ունեցել նաև սրբազան մյուս առարկաները, մասնավորապես՝ սրբապատկերները, ձեռագիր սուրբ գրքերն ու սրբոց մատունքները: Օրինակ՝ Շիրակում երաշտի ժամանակ հատուկ պաշտամունք է ունեցել Գյումրիի Ս. Աստվածածին (Յոթ Վերք) եկեղեցում պահվող «Տիրամոր յոթ վերքը» սրբապատկերը: Քահանան այն դուրս էր բերում, բազմությունն աղոթում էր, իսկ «....կանայք երկնքին նայելով արտասվում, որ երկինքը խղճա, և անձրև գա.... Չի եղել դեպք, որ այդ արարողությունների արդյունքում անձրև չգար»²⁸: Թեև մեր օրերում մոտեցումները փոխվել են, սակայն Ս. Աստվածածնի վերափոխման նախատոնակին՝ շաբաթ երեկոյան, սրբապատկերը թափորով դուրս է բերվում եկեղեցուց, տարվում Գյումրիի Վարդանանց հրապարակ, որտեղ անդաստանի, այսինքն՝ արտերի օրհնության ծիսակարգ է կատարվում²⁹: Հարկ է նկատել, որ երաշտի դեմ կատարվող նմանօրինակ արարողությունները ոչ այլ ինչ են, եթե ոչ նախաքրիստոնեական շրջանում կենցաղավարած երևույթների վերապրուկներ: Այս առումով լավագույն գուգահեռը երաշտի ժամանակ Նարի և Անահիտի կուռքերը դուրս

26 Հայկունի Ս., Բագրեւանդ. Ջրաբաշխ գաւառ, մասն Ա., Վաղարշապատ, 1894, էջ 130, ծնթ. 2:

27 Քաջբերունի, Ճանապարհորդական նկատողություններ, հրատարակության պատրաստեցին՝ Քալանթարյան Ա., Սարգսյան Գ., Մելքոնյան Հ., Եր., 2003, էջ 364:

28 Մկրտչյան Ս., Տոներ. հայկական ժողովրդական ծեսեր, սովորույթներ, հավատալիքներ (ավանդույթ և արդիականություն), Եր., 2010, էջ 110:

29 Տե՛ս Արքահայր Հ., Գյումրու «Յոթ Վերք» սրբապատկերի պատմությունը, «Էջմիածին», 2017, N Բ., էջ 111:

բերելու, տարածքում պտտելու, այնուհետ դրանց վրա ջուր լցնելու և զոհ մատուցելու անցյալում կատարված ծիսակարգն է³⁰:

Առավել հետաքրքրական են երաշտը հրաշագործություններով ու աղոթքներով կասեցնելու մասին մատենագրական վկայությունները: Այսպես, ժամանակագիր Դավիթ Բաղիշեցու հաղորդմամբ, Փիլիպոս Ա Աղբակեցի Ամենայն հայոց կաթողիկոսը (1633–1655) 1651 թ. տնօրինական այցով եղել է Երուսաղեմում, այնուհետ՝ Կոստանդնուպոլսում, որտեղ մեծ պատվի է արժանացել «....վասն նորահրաշ սքանչիցն, զի յայնմ ամի երաշտութիւն էր և առաջի ամենեցուն աղօթեաց (Փիլիպոս կաթողիկոսը – Ա. Հ.), և ի նոյն ժամն եկն անձրև սաստիկ: Եւ անտի դարձաւ յաթոռն իւր ի սուրբ Էջմիածին»³¹: Ուշագրավ է նաև Հակոբ Տիվրիկցու «Տարեգրության» մեջ երաշտին առնչվող հատվածը, ըստ որի՝ 1781 թ. Տիվրիկում «....ձմեռն սակաւ սաստիկ, ի գարունն ոչ ցօղեաց անձրև....»³², այդ պատճառով թե՛ մահմեդականների և թե՛ քրիստոնյաների երեխաները երեք օր շարունակ աղոթեցին («տուվա ըրին»), քրիստոնյաները նույնիսկ «....երկու եզ առնելով Աստուածամօր հսկում (պաշտամունքի – Ա. Հ.) գնացին, և յորժամ գենին (մատաղ արեցին – Ա. Հ.), հրամանաւ Աստուծոյ, առժամայն եօթը օր և եօթը գիշեր անձրև տեղաց և ցորենին քիլէն 4 դրուշ իջաւ և տասներեք օխան շիրան 1 դրուշ կուտային»³³: Իսկ Ամասիայի և Մարգվանի հոգևոր առաջնորդ, աստվածաբան Հովհաննես արք. Չերքեզյան Սեբաստացու մահն ու թաղումը նկարագրելիս (1797 թ. հոկտեմբերի 26) Բաղդասար դպիրն արձանագրում է թաղման մասնակիցների զարմանքն առ այն, որ ննջեցյալի մարմինը մահից երեսունչորս ժամ հետո, փոխանակ նեխելուն, «....անուշահոտ բուրմամբ զմայլեցոյց զբազմախոռ ամբոխսն և երեսք նորա պայծառացեալ փայլէր և իբր կենդանի դնէր ծիծաղախիտ ի դագաղի»³⁴: Ավելին՝ այդ նույն օրը՝ երկու ամիս տևած երաշտից հետո, «....այնմ աւուր բացան երկնից սահանք և լուծան

30 Տե՛ս **Մելիք-Փաշայան Ա.**, Անահիտ դիցուհու պաշտամունքը, Եր., 1963, էջ 30-31:

31 **Դավիթ Բաղիշեցու** ժամանակագրությունը (XVII դ.), «Մանր ժամանակագրություններ», հատ. Բ., կազմեց՝ **Հակոբյան Վ.**, Եր., 1956, էջ 360-361: Ժամանակագիր Վարդան Բաղիշեցու հաղորդմամբ՝ Փիլիպոս կաթողիկոսը Երուսաղեմ է գնացել «....18 վարդապետօք և 70 կրօնաւորօք արեղայիք.... և շինեաց զսալայարկ յատակն սուրբ Յակոբայ գեղեցիկ և վայելուչ» (նույն տեղում, էջ 395):

32 **Հակոբ Տիվրիկցու** տարեգրությունը (XVIII դ.), «Մանր ժամանակագրություններ», հատ. Բ., էջ 464:

33 Նույն տեղում:

34 **Բաղդասար դպիրի** ժամանակագրությունը (XVIII դար), «Մանր ժամանակագրություններ», հատ. Ա., էջ 345:

քաղցրատեղաց անձրեւս, որ երկ ամիս յառաջ երաշտութեամբ ծա-
րավէր երկիր և էր ժամանակ սերմանելոյ....»³⁵:

Դառնալով վիմագրական հուշարձաններին՝ նկատենք, որ վիմա-
գրագետ Սեդրակ Բարխուդարյանը ՀՀ Շիրակի մարզի **Բարձրաշենի
գյուղի Ս. Աստվածածին եկեղեցու** հյուսիսային պատի ութտողանի
արձանագրությունը հետևյալ կերպ է մեկնում. «....սպասալարների
օրոք, երաշտի հետևանքով խանձվում են դաշտերը և դրա հետևան-
քով զեղջվում են մի շարք հարկեր....»³⁶ (նկ. 3ա, բ): Դրանցից նա
առանձնացնում է *հարսանեհակն* ու *շարիաթը*, որոնցից առաջինը բա-
ցատրում է իբրև «առաջին գիշերվա իրավունքը»³⁷ ստանալու հարկ:



**Նկ. 3ա, բ. Բարձրաշենի Ս. Աստվածածին եկեղեցին և դրա հյուսի-
սային պատի արձանագրության գրչապատկերը. 13-րդ դար
(լսնկ. և գրչ.՝ Ա. Հարությունյանի, 2016 թ., 2022 թ.)**

Խնդրո առարկա վիմագրին ավելի ուշ անդրադարձել է նաև վի-
մագրագետ, լեզվաբան Սուրեն Ավագյանը, որը *հարսանեհակն* ու այլ
վիմագրերից հայտնի *հարսանեհակն* իրավացիորեն համարում է նույ-
նիմաստ, այն է՝ «....հարսանիքի, ամուսնության հասույթը, որ միջին
դարերում ամուսնացողները պետք է վճարեին տեղական աշխարհիկ

35 Նույն տեղում:

36 **Բարխուդարյան Ս.**, Սոցիալ-տնտեսական բովանդակության արձանագրություններ և դիտողու-
թյուն, «Էջեր հայ ժողովրդի պատմության և բանասիրության» (հոդվածների ժողովածու), պատ.
խմբ.: **Բարխուդարյան Վ., Հակոբյան Վ.**, Եր., 1971, էջ 90:

37 Նույն տեղում, էջ 91:

իշխանավորներին»³⁸: Ս. Ավագյանը երաշտի մասին ոչինչ չի ակնարկում՝ թերևս կռահելով, որ վիմագրում այդօրինակ վկայություն պարզապես չկա, իսկ Ս. Բաբխուդարյանի գրչապատկերած «խսանձեցալ» բառն իրականում պետք է վերականգնել «թախսանձեցայ ի բարի գործ....»³⁹, ինչպես արել ենք «Դիվան հայ վիմագրության» մատենաշարի համապատասխան պրակը հրատարակության պատրաստելիս:



Նկ. 4ա, բ. Տաթևի գյուղամիջյան աղբյուրի արձանագրությունը. 1745 թ.
(յսնկ. և գրչ.՝ Ա. Հարությունյանի, 2018 թ., 2023 թ.)

38 Ավագյան Ս., Վիմակյան արձանագրությունների բառաքննություն, Եր., 1986, էջ 162:

40 Միջնադարյան վիմագրերում հացահատիկի ցորենի, գարու և կորեկի վերաբերյալ հիշատակություններն առավելապես ապահարկման և իրավական նորմերի հաստատման շրջանակներում են, ինչը ներկա պահին մեր ուսումնասիրությունից դուրս է:

... ՆԱՏԻՐ ՇԱՀԻՆ ԺԱՄԱՆԱԿԸՆ ԷՐ. /
ՅՈՐԷՆԻՆ ԲԵՌՆ ԳՆԱՐ ԺԲՌ. (12.000) ԴԻԵՆ,
ԹՎԻՆՂ ՌՃՂԴ. (1745)⁴¹:

Մատենագրության մեջ պահպանվել են ժամանակամերձ հիշատակություններ Վանում, Ամիդում և հարակից այլ բնակավայրերում գրանցված թանկության ու սովի մասին⁴², իսկ Տաթևի հիշյալ վիմագիրը մասնավորեցնում է խնդրի հիմնապատճառը՝ Անդրկովկասում Նադիր շահի վարած քաղաքականությունը:


18-րդ դ. երկրորդ կեսին ծավալված հայ ազգային-ազատագրական շարժման ընթացքում սաստկացել են հարկահանությունը և տուրքերի գանձումը, ինչի հետևանքով Անդրկովկասի հատկապես արևելյան շրջաններում սով է սկսվել⁴³: Ակնհայտ է, որ Տաթևից մեզ հասած վիմագիր հիշատակությունը ոչ այլ ինչ է, եթե ոչ ժամանակի դեպքերի քարեղեն «հավաստագիր», ըստ որի՝ ցորենի բեռը (պարկը) արժեր 12.000 դիան (արծաթե դրամ):

Համանման գույգ վիմագրեր են հայտնի նաև 1880 թվականից. մեկն անարվեստ գրչությամբ արձանագրություն է՝ արված սալաքարի վրա, որը սկզբնապես գտնվում էր **ՀՀ Սյունիքի մարզի Վահրավար գյուղում**, բայց ներկայումս տեղակայված է **Ագարակ քաղաքի** Շինարարների փողոցում՝ բժիշկ Ախաբեջանյանների աղբյուրի հարևանությամբ (նկ. 5ա, բ), իսկ մյուսը փորագրված է **ՀՀ Գեղարքունիքի մարզի Զոլաքար գյուղում** կանգնեցված Հայաստանի ամենաբարձր խաչքարի՝ Զոլախաչի թիկունքին, մասամբ՝ նաև աջակողմյան նիստին և վարդյակի տակ: Դրանք տարիներ առաջ հրատարակել է վիմագրագետ Աշոտ Մանուչարյանը՝ աղետի պատճառ համարելով 1877-1878 թթ. ռուս-թուրքական պատերազմն ու ժամանակի անբերրի տարիները, այսինքն՝ երաշտը: Ահա Ագարակում գտնվող սալաքարի ութտողանի արձանագրությունը:

41 ԴՀՎ, պրակ II. Գորիսի, Սիսիանի և Ղափանի շրջաններ, կազմեց **Բարխուդարյան Ս.**, Եր., 1960, էջ 34, արձ. 65:

42 Այդպիսիք տես **Անանուն Վանեցու** տարեգրությունը (XVIII դ.), «Մանր ժամանակագրություններ», հատ. Ա., էջ 373-374: Տես նաև **Մարտիրոս խալիֆայի** ժամանակագրությունը (XVIII դ.), «Մանր ժամանակագրություններ», հատ. Բ., էջ 489, «Ժամանակագրական մանր հատվածներ. ԻԶ.», «Մանր ժամանակագրություններ», հատ. Բ., էջ 527 և այլն:

43 Տես «Հայոց պատմություն», հատ. III. Նոր ժամանակաշրջան (XVII դարի երկրորդ կես – 1918 թ.), գիրք առաջին (XVII դարի երկրորդ կես – XIX դարի վերջ), խմբ. **Մելքոնյան Ա.** և ուրիշներ, Եր., 2010, էջ 64:



**Նկ. 5ա, բ. Վահրավարի (այժմ՝ Ագարակում) վիմագիրը. 1880 թ.
(լսնկ. և գրչ.՝ Ս. Դանիելյանի, ՀՃՈՒ արխիվ, 2016 թ.)**

**Վասն 1880 դարուն / հացըն փութըն դառաւ / դասն մանէթ
ուռուսաց / փող: Աստուլած ազատէ, էլ չի / դեսնէք էսպէս
հրաշքն: / Ես մեռնեմ դարնամ հող, այս / գիրըս մնայ յիշատա-
կող. Մկրտիչ / Առաքելէլայն Մելիք-Ախպերջանեանց⁴⁴:**

Վիմագիրն առաջին հերթին աչքի է ընկնում տեղական խոս-վածքին բնորոշ բարբառային դրսևորումներով: Գրիչը, ըստ ամե-նայնի, հիշատակված Մկրտիչ Առաքելի Մելիք-Ախպերջանյանցն է, որին ծանոթ էին միջնադարյան գրավոր աղբյուրներում հանդիպող գրիչների թողած հետևյալ տողերը՝ «Ես մեռնեմ դառնամ հող, գիրս մնայ յիշատակող»: Սրա ավելի վաղ օրինակներից մեկն էլ պահ-պանվել է Տաթևի վանքի Ս. Գրիգոր Լուսավորիչ եկեղեցու 1532 թվակիր նվիրատվական վիմագրում. գրիչ Ներսես արեղան արծա-նագրությունն այսպես է ավարտել. «.....ձեռս փթի եւ հող դառնայ, գիր յիշատակ առ ձեզ մնա»⁴⁵:


Արձանագրությունը, փաստորեն, այն ժամանակի աղետալի օրերի՝ սովի ու համատարած թանկության լուռ վկան է: Հացի փու-

44 Մանուշարյան Ա., Հացի թանկության վիմագիր հիշատակություններ Մեղրու և Մարտունու շրջան-ներում, «Հայաստանի Հանրապետությունում 1993-1995 թթ. հնագիտական հետազոտությունների արդյունքներին նվիրված 10-րդ գիտական նստաշրջան» (գեկուցումների թեզեր), Եր., 1996, էջ 51, Աբրահամյան Է., Սովի վկայությունը Վահրավարի վիմագրերից մեկում, «Վարձք», Եր., 2022, N 17, էջ 45:

45 ԴՀՎ, պրակ II, էջ 27, արձ. 47:

թի⁴⁶ տասը մանեթ դառնալն ինքնին վկայում է կենսամթերքի կտրուկ թանկացման մասին, որն անուղղակիորեն գրիչը «հրաշք» է անվանում: Այն արձանագրվել է նաև «Մշակի» հաղորդագրություններից մեկում, ըստ որի՝ նույն՝ 1880 թ. Մեղրիից ահազանգում էին, թե «...թանգութեան պատճառով աւագակութիւնները օրըստօրէ բազմանում են»⁴⁷: Անշուշտ, աղետի պատճառը 1877-1878 թթ. ռուս-թուրքական պատերազմն էր՝ իր հետևանքային դրսևորումներով, նաև եղանակային անբարենպաստ պայմանները, որոնք ի վերջո հանգեցրին սովի: Պատերազմի ընթացքում խաթարվել էր պարենի մատակարարումը Ռուսաստանի հացառատ շրջաններից Անդրկովկաս, ամենուրեք ոչնչացվում կամ չէին մշակվում ցանքատարածությունները⁴⁸: Ժամանակի մամուլում բազմաթիվ տեղեկություններ են պահպանվել Վանի և Էրզրումի նահանգներում, ինչպես նաև Խնուսում, Սալմաստում, Իգդիրում, Նոր Բայազետում, Շուշիում և բազմաթիվ այլ բնակավայրերում գրանցված թանկության, սովի ու արտագաղթի մասին⁴⁹: Կարելի է ասել, որ 1876-1880 թվականները հայ ժողովրդի պատմության մեջ մնացին որպես հերթական զրկանքների, կոտորածի ու սովի տարիներ, որոնց վկան նաև խնդրո առարկա վիմագրերն են:

Նախորդին ժամանակակից մյուս արձանագրությունը, որը փորագրված է 13-14-րդ դդ. թվագրվող Զուլախաչի նիստերին, բովանդակությամբ առավել ընդգրկուն է. հիմնական մասը՝ 12 տող, թիկունքին է (նկ. 6ա-գ):





46 Ծանրության ռուսական միավոր փութը կշռում է 16 կգ 380 գ (տե՛ս Մալխասեանց Ստ., Հայերէն բացատրական բառարան, հատ. 4, Եր., 1945, էջ 521):

47 «Մշակ», Թիֆլիս, 1880, 4 (16) ապրիլի, N 57, էջ 3:

48 Տե՛ս Մանուչարյան Ա., նշվ. աշխ., էջ 51, Աբրահամյան Է., նշվ. աշխ., էջ 44:

49 Մանրամասն տե՛ս Աբրահամյան Է., նշվ. աշխ., էջ 44-45:



Նկ. 6ա-գ. Զոլախաչի արձանագրությունը՝ ցորենի, գարու, խոտի ու դարմանի թանկության հիշատակմամբ. 1880 թ.
(լսնկ.՝ Ս. Արևշատյանի, 2022 թ., գրչ.՝ Ա. Հարությունյանի, 2022 թ.)

ԱՐԴԷՆ ԳՐԱԾԻՅՍ[Տ] ԱՌԱՋ ԿԱՐ ԽԱՂԶՍ. / ԱՄԻ ՀԱՋԱՐ ՈՒԹ
ՀԱՐԻԼԻՐ ՈՒԹՍ/ՈՒՆԼԻՆ / ԵՐԿԻՐՍ ԵՂԵԻ ՍԱՍՏԻԿ
ԹԱՆԿՈՒԹԻԼԻՆ, / ԵՕԹ ՄԱՆԷԹ ԾԱԽՎԵՑ ՄԻ ՓՈՒԴ ՅՈՐԵՆ, /
ԳԱՐՈՒ ԼԻՏՐ ՄԱՆԷԹ ԱՐԺՕՂՈՒԹԻՆ, / ԽՈՏԻ, ԳԱՐՄԱՆԻ
ՓՈՒԴ՝ ՉՈՐՍ ՄԱՆԷԹ, / ՀԱՋԻԻ ԿԱՐԱՅԱԼՆԻՔ ԱՌՆԵԼ, ԹԷՊԷ/Տ /

**ԵՂԻՑԻ ԳԻՐՍ ԸՆԹԵՐՁՈՂԻՆ ԶԴԷՏ, / Ի ԼԻ ԺԱՄՈՒՄ ԵՂԻՑԻ
ԱՆԴԷՏ, / ՉԸՊԱԿԱՍԵՑՆԷ ՀԱՅ ԱՄԷՆ ԴԷՊ, / ՏԷՐ ՎԱՀԱՆ
ՍԱՐԳԻՍՕՎ ԳՐԱ/ԳԷՏ / ՄԱԿԱՆՈՒԼԱՆԲ / ԲԱՐԷՊԱՇՏ
ԱԼԷԲՍԱՆԴԻ ԹԱԳԱՌՐ¹ / ԱԶՏՏԵՑ ՍՈՎԻՑ ԱՇԽԱՐՀՍ ԲՈԼՈՐ⁵⁰:**

Նախ ուշագրավ է մասամբ չափածո վիմագրի առաջին տողը. որով գրիչը, որը, ըստ ամենայնի, **Գրագետ** մականվամբ Վահան Սարգիսովն է, ընթերցողին ծանուցում է խաչքար-կոթողի և իր փորագրած վիմագրի տարածամանակյա լինելու մասին, այն է՝ վիմագիրը կազմելուց առաջ խաչը (խաչքարը) արդեն կար: Միաժամանակ գրիչը ցանկանում է, որ նեղ օրերին իր գիրն ընթերցողին «դետ», այսինքն՝ դիտելի, իսկ առատ ժամանակներում «անդետ» լինի (դիտող, կարդացող չունեցող), և հացը երբեք չպակասի: Բացի ցորենի, հետևաբար նաև հացի թանկության մասին հիշատակությունից՝ վիմագրում նշվում է նաև գարու, խոտի ու դարմանի (հարդի) գնաճի մասին, և եթե ցորենի փութն այստեղ տասի փոխարեն յոթ, ապա գարու լիտրը⁵¹ մեկ, իսկ խոտի ու դարմանի փութը չորս մանեթ էր: Սա վավերացվում է նաև «Մշակ»-ի համաժամանակյա մի հաղորդագրությամբ, ըստ որի՝ Նոր Բայազետում սաստիկ թանկացումներ են եղել. «...ալիւրի պուդը, որ առաջ ծախվում էր 50 կոպեկով, այժմ արժէ 2 ռ. 60 կ. և բարձր»⁵²: Այս հիշատակությունը հստակ պարզում է գնաճի չափը, այն է՝ մեկ փութը նախկին հիսուն կոպեկի փոխարեն դարձել էր յոթ մանեթ: Վիմագիրն ամբողջացվում է ռուսաց Ալեքսանդր Բ կայսեր (1855-1881) կողմից երկրի՝ սովից ազատման մասին հիշատակմամբ:

Այն, որ հացի սղության ու թանկության պատճառը նաև եղանակային անոմալ երևույթներն էին, վերահաստատում են դարձյալ մամուլի հաղորդագրությունները: Այսպես՝ 1882 թ. ապրիլի 2-ին Նոր Բայազետից հայտնում էին, որ տակավին ցուրտ է, ձյունն ու բքաբեր քամիները՝ անպակաս, Սևանա լիճը դեռ սառած է, ձկնոր-

50 Մանուշարյան Ա., նշվ. աշխ., էջ 52:

51 Լիտր կշռային միավորը, ըստ տեղանքի, տարբեր մեծություն է ունեցել, օրինակ Հայաստանում երևանյան լիտրը համարժեք էր 12 ռուսական ֆունտի կամ մոտ 5 կիլոգրամի: Ծանրության այս չափը վիմագրերում քանիցս վկայված է (Անի, Արթիկ, Ամբերդ, Սանահին և այլն), իսկ առավել բնորոշ զուգահեռները Վաղարշապատի 18-րդ դ. նվիրատվական վիմագրերում են, որոնց ավելի վաղ անդրադարձել ենք (տե՛ս Հարությունյան Ա., Վաղարշապատ. վանքերը և վիմական արձանագրությունները, Ս. Եջմիածին, 2016, էջ 260-265, 340-341, արձ. 521-526, 680):

52 «Մշակ», 1880, 5 (17) մարտի, N 35, էջ 3:

սությունը՝ խափանված, իսկ «երկրագործները դեռ ոչինչ գործ չեն սկսել, ո՛չ ցանել, ո՛չ էլ հերկել են: Բայց դարձեալ նրանք յուսով ապրում են, վասն զի սոցա ցանք անելու ժամանակը կարող է լինել մինչև մայիսի սկիզբները»⁵³: Կամ՝ 1883 թ. սեպտեմբերին դարձյալ Նոր Բայազետից գրում էին, որ «եղանակը շատ վատ է այստեղ. ամեն օր շարունակ բաւական անձրև է թափվում և խեղճ հողագործների ցորեն և գարի կալսելը այս պատճառով յետաձգվում է օրից օր»⁵⁴: Իսկ 1895 թ. հունվարի 18-ին Նոր Բայազետից գրում էին, որ «մինչև այժմ այստեղ ձիւն չէ եկել և շատ չոր եղանակ է անում, որը շատ վնաս է աշնանացան արտերին: Բացի դրանից, ձիւն չը գալու պատճառով ամառը սարերում ջուր չի լինի անասունների խմելու համար, քանի որ մեր սարերում, ջուր չը լինելու պատճառով անասունները ջուր են խմում հալվող ձիւնից գոյացած լճակներում. եթէ այսպէս շարունակվի, թէ արտերի բոյսը և թէ արտերը վատ կը լինեն»⁵⁵: 1916 թ. հունվարի 9-ի նամակում նշվում է դարձյալ Նոր Բայազետում գրանցված տարօրինակ եղանակային պայմանների մասին, մասնավորապես. «....ամբողջ 6 ամիս միալար չորութիւն, երաշտ: Սկսած խոտի հնձից մինչև այժմ ժողովուրդը ոչ անձրևի երես է տեսել և ոչ էլ մի կարգին ձիւն է եկել: Այսպիսի տաղտկալի և միապաղաղ չորային եղանակները, շատերի կարծիքով, անշուշտ վատ են ազդելու հողագործութեան վրա ապագայում, քանի որ երաշտի պատճառով աշնանացանը շատ տեղերում տեղի չունեցաւ, հողի փափկութիւնը և խոնաւութիւնը միայն կարող են միջոց տալ աշնանացանը անարգել կատարել: Եթէ գիւղացին միջոց չունենայ իր ցանքը իր ժամանակին անելու, ապա ուրեմն նա սովի դուռն է հասնելու....»⁵⁶:

Բովանդակային առումով համանման է նաև **Արցախի Ասկերանի շրջանի Շոշ գյուղի Ս. Աստվածածին եկեղեցու** կառուցման 1918 թ. վիմագիրը, որի վերջում գրիչը ցորենի թանկության մասին հիշատակություն է թողել⁵⁷ (նկ. 7ա, բ): Վեցտողանի վիմագիրն ամ-

53 «Մշակ», 1882, 8 (20) ապրիլի, N 58, էջ 1: Այս և հաջորդիվ հիշատակվող հաղորդագրությունների մասին մեզ տեղեկացնելու համար շնորհակալություն ենք հայտնում աղբյուրագետ Արմեն Ասատրյանին:


54 «Մշակ», 1883, 14 սեպտեմբերի, N 129, էջ 1:

55 «Մշակ», 1895, 28 յունվարի, N 11, էջ 3:

56 «Մշակ», 1916, 21 յունվարի, N 13, էջ 4:

57 Վիմագրի մասին տեղեկացնելու և լուսանկարը տրամադրելու համար շնորհակալություն ենք հայտնում հնագետ, պ. գ. դ. Համլետ Պետրոսյանին:

փոփոռ ուղղանկյունաձև սալաքարն ագուցված է եկեղեցու հարավային մուտքի վերնամասում՝ արտաքուստ:




Նկ. 7ա, բ. Շոշի Ս. Աստվածածին եկեղեցու վիմագիրը. 1918 թ. (լսնկ.՝ Հ. Պետրոսյանի, 2019 թ., գրչ.՝ Ա. Հարությունյանի, 2022 թ.)

Յիշատակ կառուցեց սուրբ / եկեղեցիս Շուշվեցի Բաղ/դասար սլալրկաւայգն Աբարեանց / ու իր ընկեր Առուստամ Գափ/իեան Խառաղեալնց, 1918 թ., / որ է ցորենի փոթ էր 20 ըւրբլի:

Դատելով վիմագրի բովանդակությունից՝ եկեղեցու կառուցման նախաձեռնողներն էին ծագումով Շուշիից Բաղդասար սարկավագ Աբարյանն ու իր ընկեր Առուստամ Գափիյան-Խառատյանցը: Վերջում գրիչն արձանագրել է նաև կառուցման տարեթիվը՝ 1918 թ., միաժամանակ ակնարկել նաև ցորենի աննախադեպ թանկության մասին, ըստ որի՝ մեկ փութ ցորենն արժեք քսան ռուբլի (մանեթ):

Այն, որ երկրում հացի սղությունն ու թանկությունը հանգեցրել են սովի, վկայում է ՀՀ Կոտայքի մարզի Զառ գյուղի ձորում գտնվող մի ժայռաբեկորի հնգատող արձանագրությունը (նկ. 8ա, բ):



Նկ. 8ա, բ. Սովի և թանկության մասին վկայող վիմագիրը (լսնկ.՝ Գ. Սարգսյանի, 2010 թ., գրչ.՝ Ա. Հարությունյանի, 2022 թ.)

**ՅԱՅՍ ԶԱՂԱՑ ՇԻՆԷՑԻ ՍՈՎԻ ՏԱՐ/ԻՆ, ԱՔԷԹՆԱԿ ՄՀԷՐԵԱՆ, ՅԻՄ
ՈՐԳԻ / ՍԱՐԳԻՍԻՆ ՅԻՇԱՏԱԿ, 1922 Թ.: ՄԻ ՀԱՌ/ԿԻԹ ՄԻ
ՄԻԼՅՈՆ, ՀԱՅԻ ԳԻՆԸ (°) / 2 ՄԻԼՅՈՆ ԿԷՄ⁵⁸:**

Վիմագիրը բնութիւնով շինարարական է և կազմվել է գյուղում ջրաղաց կառուցելու առիթով: Այլ հարց է, որ գրիչը, որը, ըստ ամենայնի, ոմն Աբեթնակ Միեռյանն է, ի հիշատակ իր որդի Սարգսի, շինարարությունն իրականացրել է մի այնպիսի շրջանում, երբ երկրում սով էր, ուստի գեղարվեստական պատկերավորմամբ վիմագիրն ավարտել է հավկիթի ու հացի (ցորենի) չափազանցված «գնացուցակով». հավկիթն արժեր մեկ միլիոն, հացը՝ երկուսուկես միլիոն: Սրանով գրիչը, ըստ էության, փորձել է շեշտել երկրում տիրող սաստիկ թանկությունն ու սովը, որին, բացառված չէ, որ զոհ է դարձել նաև իր որդի Սարգիսը:

Բ. Մորելիս

*Թագուր չունին, ժողովին առակ, / Իջնուն ահեղ անթիւ քանակ,
Եղուկ՝ ում գան անվարձ մշակ, / Հնձեն զամէն արտերն հսարակ (Մարախ)⁵⁹:*

Ներսես Շնորհալի

Երաշտի հետևանքային դրսևորումներից էր նաև մորելիսների (վկայված նաև *մարախ, մեղեխ, մեղախ, ձեւորար, խառնիձ, կիպուռ, չաքուրկա* և այլ անուններով) կտրուկ բազմացումն ու տարածումը, որն ինչպես մատենագրության, այնպես էլ ժողովրդական ավանդության մեջ քանիցս վկայված է⁶⁰: Հատկանշելի է տեր Փիլիպոս Թեքիրտաղցու տաղերից մեկը՝ գրված 1708 թ. ապրիլի 15-ին Քիլիս քաղաքը պատուհասած մորելիսների աղետի առիթով: Բավական ընդարձակ չափածո ստեղծագործությունը (ԽԱ տուն) հրատարակած արաբագետ Միհրան Մինասյանի բնորոշմամբ՝ տեր Փիլիպոսն այն-



58 Վիմագրի լուսանկարը սիրահոժար մեզ տրամադրելու համար շնորհակալություն ենք հայտնում վիմագրագետ, պ. գ. թ. Գագիկ Սարգսյանին:

59 **Ներսես Շնորհալի**, Հանելուկներ, առաջաբանը և քննական բնագիրը՝ **Ա. Մնացականյանի**, «Մատենագիրք Հայոց», հատ. ԻԱ., էջ 1288:

60 Մատենագրական սկզբնաղբյուրների հիման վրա մորելիսների ակտիվացման երևույթն ավելի վաղ անդրադարձել է վիմագրագետ Գագիկ Սարգսյանը (տես **Սարգսյան Գ.**, Մորելիսների արշավանքները, «Արտակարգ թերթ», Եր., 2004, N 9, էջ 1, 4, N 10, էջ 4): Վերջերս երևույթն անդրադարձել է նաև պատմաբան Միքայել Մալխասյանը՝ այն համարելով ցանքատարածությունների տևական ժամանակ անմշակ մնալու հետևանք, քանի որ «...հողը մեկ ամբողջ տարի անմշակ թողնելը մորելիսների կտրուկ բազմացման համար նպաստավոր պայման է» (**Մալխասյան Մ.**, նշվ. աշխ., էջ 194):

քան խորն է ազդվել շուրջ երեք ամիս տևած աղետից, որ տաղում մանրամասն նկարագրել է քաղաքի վիճակն ու մորելիսների (բնագրում՝ մարախ) հասցրած վնասները. «Ծածկեալ եղև երեսս յօդոյն, / Եհեղ երկնից իբրև զձին, / Թռեալ իջեալ մէջ սարերոյն, / Թաղեաց որդունք ի հող գետոյն...»⁶¹: Նկատենք, որ մորելիսների աղետը նույնպես ուղեկցվել է սովով, նաև գաղթով: Այն համեմատվել է օտար բռնակալների, մասնավորապես՝ Լենկ Թեմուրի արշավանքների հետ, և, որ ուշագրավն է, արաբ գրող, բնիկ հալեպցի Աբդուլ Ռահման ալ Քաուաքիրի (1849-1902) դիպուկ բնորոշմամբ՝ «Երեք են մայր ամենայն չարեաց՝ ոջիլը, թուրքը եւ.... մարախը»⁶²:

Երկիրը պատուհասած մորելիսների հիշատակմամբ վիմագրերը սակավաթիվ են: Դրանցից մեկը վկայված է **Արցախի Մարտունու շրջանի Հերիեր գյուղի Ս. Գրիգորիս եկեղեցու** արևմտյան մուտքի բարավորին, ըստ որի՝ եկեղեցին կառուցվել է դառն ու նեղ մի շրջանում՝ 1673 թ., երբ ողջ Աղվանից երկիրը պատուհասել էին մորելիսները (վիմագրում՝ մարախ) և ոչնչացրել արտերը (նկ. 9ա, բ):



Նկ. 9ա, բ. Մորելիսի տարածման մասին Հերիերի Ս. Գրիգորիս եկեղեցու վիմագիրը. 1673 թ.

(լսնկ.՝ Գ. Բուդաղյանի, 2022 թ., գրչ.՝ Ա. Հարությունյանի, 2022 թ.)

61 Մինասեան Ս., Տէր Փիլիպոս (Փիլիպպէ) Թեքիտաղցի ու իր տաղերը, «Հայկազեան հայագիտական հանդէս», Պէյրոս, 2011, N ԼԱ., էջ 475:

62 Նույն տեղում, էջ 474:

**ԶՕՐՈՒԹՆԱՄԻՆ ԱՍՏՈՒԾՈՅ, ՇԻՆԵՑԱԻ ՍԲ ԵԿԵՂԵՑԻՍ Ի
ԴԱՌՆ ԵՒ Ի ՆԵՂ ԺԱՄԱՆԱԿԻՍ. ՎԱՍԼՆ ԾՈՎԱՅԵԱԼ ՄԵՂԱՅ
ՄԵՐՈՅ ԵԿՆ ՄԱՐԱԽ, ԵԿԵՐ ԶԵՐԿԻՐՍ ԱՂՎԱՆԻՅ ԵՒ ԱԻԵՐԵՅ ԲԱ-
ԶՈՒՄ ՏԵՂԻՍ... ԹՎԻՆ ՌՃԻԲ. (1673)⁶³:**

Բնույթով շինարարական վիմագիրը պատմագիտական մեծ արժեք ունի, որում հիշատակված է ոչ միայն եկեղեցու շինարարության փաստը, այլև այն, թե ինչ պայմաններում է այն կատարվել: Նույն եկեղեցու հարավային մուտքի վիմագիրն էլ պարզում է շինարարության սկիզբն ու ավարտը՝ 1667-1676 թթ., և այն, որ եկեղեցին կառուցվել է իբրև հովարան (ամառանոց) Ամարասի միաբանության համար:


Դեռևս 17-րդ դարասկզբին Հայաստանի կենտրոնական շրջաններում մորելխների ակտիվացման մասին է վկայում Առաքել Դավրիժեցին: Պատմագրի հաղորդմամբ՝ աղետն ուղեկցվել է հացի սղությամբ ու սովով. «....յորոյ յետագայ եղև սով սաստիկ և բնաւին ոչ երևիր հաց և կերակուր և այլ ինչ ուտելի»⁶⁴: Սրանով պայմանավորված՝ Միքայել Մալխասյանը 1606-1609 թթ. մեծ սովի հիմնական պատճառներից մեկը համարում է «16-17-րդ դարերի սահմանագլխին եղանակային պայմանների փոփոխությունը և մորելխների պոպուլյացիայի ակտիվացումը»⁶⁵:

Մորելխների հասցրած վնասների ու դրանցից ազատվելու ծիսակատարության վկայությամբ մի ուշագրավ վիմագիր է հայտնի պատմական **Երնջակ գավառի Զուղա գյուղի Ս. Գևորգ եկեղեցուց** (նկ. 10ա, բ): 1867 թվակիր ընդարձակ արձանագրությունը (15 տող) ամփոփող քարը, որն ագուցված է եղել հիշյալ եկեղեցու հարավային մուտքի վերնամասում, նախիջևանյան մշակութային ժառանգության հետ 1998-2006 թթ. ոչնչացվել է Ադրբեջանի պետականորեն իրագործած մշակութային եղեռնի հետևանքով: Բարեբախտաբար, վիմագիրը ժամանակին լուսանկարել, վերծանել ու հրատարակել է նախիջևանագետ Արգամ Այվազյանը: Մենք այն վերընթերցել ու ծանոթագրել ենք:

63 ՂՀԿ, պրակ V. Արցախ, կազմեց **Բարխուդարյան Ս.**, Եր., 1982, էջ 165, արձ. 571:

64 **Առաքել Դավրիժեցի**, Գիրք պատմութեանց, աշխատասիրությամբ **Լ. Խանլարյանի**, Եր., 1990, էջ 108:

65 **Մալխասյան Մ.**, նշվ. աշխ., էջ 176:



Նկ. 10ա, բ. Մորելսների բազմության և դրանց դեմ պայքարի մասին վկայող վիմագիրը. 1867 թ.

(լսնկ.՝ Ա. Այվազյանի, 1987 թ., գրչ.՝ Ա. Հարությունյանի, 2022 թ.)

1867 ԱՄԻ, 10 ՄԱՅԻՍԻ / ԵՂԵԻ ՄԵԾ, ԶԱՐՄԱՆԱԼԻ ՄՈՐԵԽ / ՎԼԱՍՆ՝ ՄԵՐ ՄԵՂԱՅՆ, ՄԵՆՔ ԷԼ ԸՍ/ԿՍԵՑԻՆՔ ԿՈՏՈՐԵԼ, ԲԱՅՑ ՈՐ/ՔԱՆ ՄԵԼՆԵՐ ԿՈՏԼՈՐԵՑԻՆՔ, ՆՈՔԱ ԲԱԶՄԱ/ՑԱՆ, ԵՅԵՏՈՑ ՏԵՍԱՆՔ, ՈՐ ՃԱՐ ԶՈՒՆԻ, / ԴԱՌՑԱՆՔ ԴԷՊ ԱՌ ԱՍՏՈՒԱԾ ԲԱԶԱԲԵԼ, / ՄԱՏԱՂ ԱՆԵԼ, ՍԲ ՊԱՏԱՐԱԳ ՄԱՏՈՒ/ՑԱՆԵԼ, ԱՆԴԱՍՏԱՆ ԱՆԵԼ, ԻՍԿՈՅՆ / ԱՍՏՈՒԱԾԻՆ ՈՂՈՐՄՈՒԹԵԱՄԲՆ ԹՈՒԶՈՒՆՔ ԵՐ/ԿՆԻՑ ԹԱՓԵՑԱՆ, 3 ՕՐՎԱ ՄԷՋ ԱՄԷՆ / ՄՈՐԵԽՆ ԸՍՊԱՌԵՑԻՆ: ԵԻՍ ԱՅՆ / ԺԱՄԱՆԱԿԻՆ ԵՂԵԻ ՍՂՈՒԹԻԻՆ՝ ՀԱՅԻ. ՑՈՐԵՅՆԻ / ԼԻԴՐՆ 2 ՄԱՆԷԹ, ԿՕՐԷԿՆ՝ ՄԱՆԷԹ ԿԷՍ, / ԱՍՏՈՒԱԾ ՈՂՈՐՄԻ ԳԱԼՈՒՍՏԻՆ ԵՒ ԾՆՈՂԱՅ՝⁶⁶:

Ջուղա գյուղի Ս. Գևորգ եկեղեցին հակիրճ նկարագրել է Ս. Էջմիածնի միաբան Արիստակես եպս Սեդրակյանը, որի հաղորդմամբ՝ «Նոր շինուած գիւղի հիւսիսային ծայրին է այս եկեղեցին յանուն Ս. Գէորգայ, հին Ս. Գէորգ եկեղեցոյ պատուոյ համար, որոյ աւերակներն առաջին Ջուղայի մէջն են...»⁶⁷: Համանման տեղեկություններ է հաղորդում նաև Հ. Ղևոնդ Ալիշանը, սակայն նրանք արձա-

66 Այվազյան Ա., Նախիջևանի վիմագրական ժառանգությունը, հատ. Ա. Ջուղա, Եր., 2004, էջ 155, արձ. 1037:

67 Սեդրակյան Արիստակես վրդ., Հնութիւնք հայրենեաց ի գաւառին Երնջակու, Վաղարշապատ, 1872, էջ 153:

նագրությունը չեն հիշատակում⁶⁸: Արդեն նախորդ դարի 80-ականներին եկեղեցին անմխիթար վիճակում էր. պահպանված մի լուսանկարում տեսանելի են հարավային մուտքի երկու կողմերում ագուցված խաչքարերը, որոնք, ըստ Ա. Այվազյանի, Հին Ջուղայի գերեզմանոցից են բերվել ու ագուցվել եկեղեցու շարվածքում⁶⁹:

Դառնալով արձանագրությանը՝ նախ ասենք, որ այն կարևորվում է մի քանի առումներով՝

ա. մորելիսների տարածման մասին հիշատակությամբ,

բ. տարբեր եղանակներով մորելիսների տարածումը կանխելու՝ կոտորել, աղոթել, պատարագ մատուցել, մատաղ ու անդաստան անել,

գ. Աստծու ողորմությամբ մորելիսների ոչնչացման,

դ. հետևանքների, ի մասնավորի՝ հացի սղության,

ե. թանկության՝ ցորենի և կորեկի գնաճի վկայությամբ:

Վերը նշեցինք, որ երաշտի ուղղակի հետևանք հանդիսացող մորելիսների, թրթուրների և վնասատու այլ միջատների ակտիվացման երևույթը մատենագրական սկզբնաղբյուրներում քանիցս վկայված է, ուստի վիմագիրը մեծապես կարևորվում է իբրև տարերային աղետի մասին վկայող քարեդեն վավերագիր: Ժամանակաշրջանի առումով խիստ ուշագրավ է Դավիթ վրդ. Տեր-Դավթյան Ուլնեցու 1867 թվակիր հաղորդումն առ այն, որ Քիլիս քաղաքի հայերը դեռևս դրանից ութ տարի առաջ քանդել էին իրենց հին եկեղեցին ու վարժարանը՝ նորերը կառուցելու նպատակով, սակայն «....այն տարիէն մինչև ցայսօր մարախը ամէն տարի կու գայ տոսկալի բազմութեամբ և ցանածնին կուտէ, հետեւաբար սովու և սղութեան մէջ իյնալով, վարժարաննին և եկեղեցինին մնացած են կիսկատար, իրենք ալ յետին խեղճութեան մէջ, ծանր տուրքերու ներքև ճնշուելով՝ յուսահատութեան մէջ ինկած են»⁷⁰: Այսինքն՝ աղբյուրները, մեկը մյուսին լրացնելով, վկայում են առնվազն 1859 թվականից ի վեր Նախիջևանից մինչև պատմական Դաշտային Կիլիկիայի հարավային շրջաններն ընդգրկած մորելիսների աղետի պատճառած վնասների մասին:

68 Տե՛ս Ալիշան Ղ., Սիսական. տեղագրութիւն Սիւնեաց աշխարհի, Վենետիկ, 1893, էջ 427:

69 Տե՛ս Այվազյան Ա., նշվ. աշխ., էջ 153-154:

70 Տէր-Դաթեանց Դաւիթ վրդ. Ուլնեցի, Ստորագրութիւն այցելութեան, «Արշալոյս Արարատեան», Զմիւռնիա, 1867, 24 յունիս, N 808: Տե՛ս նաև Մինասեան Մ., նշվ. աշխ., էջ 487, ծնթ. 20:

Մորելիսների արագ տարածումն ու արտերին հասցրած վնասները կանխող միջոցառումների շարքում նշելի են հատկապես ծիսական, սնոտիապաշտական հենք ունեցող սովորույթները: Նախքան դրանց մասին խոսելը նկատենք, որ գրականության մեջ հանդիպում են նաև *մորելիսակոռ* և *մորելիսարեղ* տերմինները, որոնք բացատրվում են իբրև «մորելիսը կոտորելու համար հարկադիր աշխատանք (կոռ) մորելիսն իջած տեղում, երբ չափահաս մարդիկ, առանց սեռային խտրականության, լծվում են մորելիսը կոտորելու գործին»⁷¹: Այս առնչությամբ վիմագրում նշվում է, որ «...որքան մենք կոտորեցինք, նոքա բազմացան», որից հետո դիմել են Աստծու ողորմությանն ու ծիսակատարություններին:

Մխիթար Գոշի առակներից մեկը բովանդակում է Աստծու հրամանով մորելիսների հասցրած վնասների և դարձյալ Աստծու ողորմությամբ տարմ կոչվող թռչունների միջոցով նույն այդ մորելիսներից ազատվելու մասին պատմությունը. «Մարախ, զաւր անուանի Աստուծոյ, զի նորին հրամանաւ ժողովի ապականել զերկիր, եւ նորին ակնարկութեամբ առաքի տարմ ի ջնջել զնա»⁷²: Տարմը կամ տարմահավը երգեցիկ թռչուն է, որը սնվում է միջատներով և առավել հայտնի է իբրև մորելիսներ որսացող-ոչնչացնող թռչուն⁷³: Այս տեսանկյունից հիշյալ առակը քննվող վիմագրի միջնադարյան լավագույն նախօրինակը կարող է համարվել՝ նկատառելով վնասատու մորելիսներին Աստծու ողորմությամբ թռչունների միջոցով ոչնչացնելու հանգամանքը⁷⁴: Մորելիսների բազմության ու տարմ թռչունների կողմից դրանց ոչնչացման մասին մի ուշագրավ դրվագ է ներկայացնում նաև Կիրակոս Գանձակեցին, որն աղետից ազատվելը նույնպես վերագրում է Աստծու բարեգթությանը: Իր պատմության ԾԶ՝ «Վասն մարախին, որ եկեր զաշխարհս» գլխում Գանձակեցին մանրամասն նկարագրում է 1252 թ. Պարսկաստանից ներթափանցած մորելիսների տարափը, որոնց բազմությունն այնքան մեծ է եղել, որ վեր բարձրանալիս արևը ստվերել է: Մորելիսները ոչնչացրել են ողջ

71 Մալխասեանց Ստ., Հայերեն բացատրական բառարան, հատ. 3, Եր., 1944, էջ 359:

72 «Առակը Մխիթարայ Գոշի», աշխատասիրությամբ ԷՄ. Պիւագեանի, առաջաբանը Օ. Վարդապետեանի, «Մատենադարձ Հայոց», հատ. Ի., ԺԲ. դար, գիրք Բ., Եր., 2014, էջ 95, N ԺԾԸ.:

73 Տե՛ս Մալխասեանց Ստ., Հայերեն բացատրական բառարան, հատ. 4, էջ 388:

74 1401 թվակիր մի ձեռագրի հիշատակարանի համաձայն՝ Ոչտունյաց ծովում (Վանա լճում) աստվածային ողորմությունը վրա հասավ և մորելիսների ողջ բազմությունը կոտորեց, «....գոր ալիք ծովում դեզադեզ, իբր գշիղջս աւագաց, յեզրն կուտեաց....» («Հայերեն ձեռագրերի հիշատակարաններ. ԺԵ. դար», մասն Ա. (1401-1450 թթ.), կազմեց Խաչիկյան Լ., Եր., 1955, էջ 3, N 1):

բուսականությունը, ծածկել քար ու հող, ինչի հետևանքով երկրում հացի սղություն է առաջացել ու շարունակվել նաև 1253 թ. գարնանը: Մարդիկ փորձել են լքել իրենց տները, «....զի յառաջագոյն կերեալ էր զշրջակայ գաւառսն՝ սկսեալ ի Սպանիոյ, և յԱսիոյ, և ի Պարսից և ի Միջագետաց....»⁷⁵: Դիմել են նաև Աստծու բարեխոսությանը, «....որ յոչէէ գոյացոյց զարարածս և ողորմութեամբ իւրով խնամէ զսոսա միշտ.... իսկ ողորմածն Աստուած խիստ վիրացն ետ սպեղանիս արագ...., քանզի եկն բազմութիւն մանր հաւուցն պիսակաց, զոր վասն բազմութեանն տարմ անուանեն սովորաբար, և կարգ կալեալ յեզերացն, առ հասարակ սպառեալ եկեր զամենայն բազմութիւն մարախոյն, այնքան, զի և մի ոչ գտանիր»⁷⁶:

Ազգագրագետ Երվանդ Լալայանի հաղորդմամբ՝ Հայաստանի հյուսիսում լայն տարածում է ունեցել ջրի պաշտամունքը, որի առնչությամբ ծիսակատարության մի քանի օրինակ է հիշատակում: Դրանցից մեկը հացահատիկի հյութը ոչնչացնող «բողոճ» (սև բլոջ) կոչված միջատների բազմացման դեմ է, ինչի համար գյուղացիները Չարդախլու գավառի մի ժայռափոր սուրբ աղբյուրի մոտ մոմ են վառում, երկրպագում, ապա ջուր են բերում ու դնում եկեղեցու սուրբ սեղանին, որից հետո «քահանան վերցնում է այդ եւ բոլոր գյուղացիների հետ շրջում արտերը, անդաստան կատարում և ջուրը սրսկում արտերին: Իսկույն այդ «բողոճները» կոտորվում են եւ կամ թռչում հեռանում են»⁷⁷: Առավել ուշագրավ է արտերը պատուհասած մորեխների բազմացման դեմ կատարվող արարողությունը, ըստ որի՝ Ակոռիի Ս. Հակոբավանքի աղբյուրից ջուր են բերում, անդաստանի ծիսակարգ անում, արտերը սրսկում, և «իսկույն երևում են սև ժեռ կոչված թռչունները, որոնք կոտորում են մորեխներին»⁷⁸: Ակնհայտ է, որ ծեսի մեջբերված հատվածն ուղղակիորեն վավերացնում է վերոնշյալ վիմագրում վկայված արարողության ընթացակարգը, այն է՝ սեփական ուժերով մորեխների դեմ պայքարը ձախողելուց հետո գյուղացիները դիմում են Աստծուն, աղոթք անում,

75 Կիրակոս Գանձակեցի, նշվ. աշխ., էջ 360:

76 Նույն տեղում, էջ 360-361:

77 Լալայան Ե., Բորչալուի գաւառ. Ջրի պաշտամունք, էջ 196:

78 Նույն տեղում: Համանման է նաև Նոր Բայազետի Ս. Հովհաննես սրբավայրի մոտ գտնվող աղբյուրից ջուր վերցնելու և մկներից կամ մորեխներից արտերը պաշտպանելու մասին ավանդությունը (տես Լալայան Ե., Նոր-Բայազետի գաւառ. Ջրի պաշտամունք, «Ազգագրական հանդես», գիրք XVII, Թիֆլիս, 1908, էջ 87):

պատարագ մատուցում, մատաղ ու անդաստանի ծիսակարգ անում, որից հետո տեղի է ունենում սպասելին, այն է՝ թռչունների (տարմահավերի) երամները երեք օրում ուտում-սպառում են մորեխների ողջ բազմությունը: Այդ թռչուններին հաճախ նույնացնում են սարյակների հետ, և պատահական չէ, որ լոռեցիների համար սարյակը սուրբ թռչուն է⁷⁹:

Երաշտը, սաստիկ շոգը և եղանակային այլ անոմալիաներ, նաև մորեխների բազմացումը, ինչպես տեսանք, մշտապես ուղեկցվել են թանկությամբ ու սովով: Այս առումով խնդրո առարկա վիմագիրը ևս վկայում է աղետի հետևանքով առաջացած հացի սղության մասին, երբ ցորենի լիտրը դարձել էր 2, կորեկինը՝ 1,5 մանեթ (ռուսական դրամ): Մատենագրությունից հայտնի են համանման այլ օրինակներ ևս: Այսպես, 1401 թ. Խիզանում ընդօրինակված Ավետարանի գրիչ Զաքարիայի հաղորդմամբ, երկրում «վասն ծովացեալ մեղաց»⁸⁰ պանդխտություն սկսվեց. «....և եկն մարախ (մորեխ - Ա. Հ.), և եղև սով սաստիկ ընդ ամենայն երկիր, որ բերէր կապիճ (մեկ գրիվի տասներորդ մասը - Ա. Հ.) հացն Մ. (200) դրամ....»⁸¹: Կամ՝ 1419 թ. Ցիպնայի վանքից Գրիգոր գրիչը վկայում էր, որ երկիրը պատուհասեցին մորեխները. «....և թանձրախիտ ծածկեաց զդաշտ և զլերինս, զսար և զձոր.... կերաւ շատ վաստակ ի բազում տեղիս, յորմէ սասանեցան մարդիկք, և եղև սղութիւն»⁸²: Կամ՝ Աղվանքից հայտնի 1420 թվակիր մի ձեռագրում կարդում ենք, որ յոթ տարի մորեխներն ավերել-ոչնչացրել են աշխարհը. «....վասն մեղաց մերոց է. (7) ամ է, որ մարախ զամենայն աշխարհ աւերեաց, և դեռևս ենք ի կասկածի....»⁸³: Իսկ եղվարդում «Գիրք հարցմանց»-ի ընդօրինակումն սկսած և Ռշտունիքի Անձնապատի վանքում ավարտած Թումա գրիչը դրա հիշատակարանում մանրամասն նկարագրում է երկիրը պատուհասած աղետը՝ մորեխների ու խառնիճների կտրուկ աճը, որի հետևանքով «էկեր զամենայն խոտ և աչառեաց և սպառեաց զամենայն վաստակ սերմանեալ, նուաղէն անասունք, լքեալ դա-

79 Տե՛ս Գասպարյան Գ., Գրիգորյան Ա., Հակոբյան Ա. և ուրիշներ, Հայոց լեզվի բարբառային բառարան, հատ. Բ. (Է-Օ), Եր., 2002, էջ 157:

80 Վերահաս դժբախտությունները մեղքերով ու աստվածային ցասմամբ պայմանավորելու մասին տես մեր հոդվածաշարի երկրորդ մասում (էջ 187-188):

81 «Հայերեն ձեռագրերի հիշատակարաններ. ԺԵ. դար», մասն Ա., էջ 8, N 5:

82 Նույն տեղում, էջ 225, N 246:

83 Նույն տեղում, էջ 240, N 264: Հմմտ. «Հայերեն ձեռագրերի հիշատակարաններ. ԺԵ. դար», մասն Բ. (1621-1640 թթ.), կազմեց՝ Հակոբյան Վ., Հովհաննիսյան Ա., Եր., 1978, էջ 1, N 1:

տարկեցան երկրագործք ի վաստակելոյ, խցեալ կալնուին զերդ և զպատուհան ի ներքս լինելոյ նոցա: Մինչ զի զերդս պահէին աւելելով կամ մաղ ի վերայ դնելով....»⁸⁴: Հետագա դարերի ժամանակագրություններից մեկում Ամիդի Չնքշո Ս. Աստվածածին վանքի առաջնորդ Գասպար վարդապետը հաղորդում է, որ «թվին ՌՄԻԷ. (1778) բազում չաքուրկայ (մորելի – Ա. Հ.) և կարկուտ էկաւ. կարի դժուար, սով սաստիկ եղաւ....»⁸⁵: Իսկ 1872 թ. Ալեքսանդրապոլում երկու ամիս անձրև չէր տեղացել. «Ծերունիք խիստ վշտացած են, նոքա ասում են, որ այս տարուայ պէս շոգ և թանգութիւն տեսած չեն: Հացը և միւս ուտելիքները շատ թանգ են: Ես տեղեկացայ, ալիւրի փութը աժէ 1 ռ. 20 կ.»⁸⁶: Աղետը կանխելու համար նրանք «Տիրամոր յոթ վերքը» սրբապատկերը շարունակ պտտել են գյուղերում ու ապավինել սրբությանը⁸⁷, ինչպես ավելի վաղ արվել էր Ջուղայում՝ «....ունելով բարեխօս զՍբ Ստեփանոս Նախավկայն»⁸⁸:

Տպավորիչ է նաև Կարին-Թեոդոպոլսում 1314 թ. ընդօրինակված ձեռագրի հիշատակարանում Սարգիս գրչի՝ մորելիների բազմության պատկերավոր նկարագրությունը, ըստ որի՝ «վասն մեղաց մերոց» վնասաբեր այդ միջատները տասն օրվա ճանապարհը մեկ օրում էին անցնում. «....գտասն աւուր ճանապարհն ի մի օրն անցանէր....»⁸⁹: Ավելին՝ մորելիներն այնքան շատ էին, որ ոչ ոք չէր կարող տեսնել նրանց բարձրությունը, և մինչև անգամ «....ի թանձրութենէ նորա փոխիւր գոյն Արեգականն, գոչէր՝ իբրեւ զգետ, եւ անցանէր՝ իբրեւ զքամի....»⁹⁰:

Չմոռանանք նշել, որ խնդրո առարկա վիմագրի վերջում գրիչը, որն իր անունը համեստորեն չի արձանագրել, Աստծուց մի «ողորմի» է հայցում ոմն Գալուստի և նրա ծնողների համար: Ենթադրելի է, որ նրանք տարերային աղետի զոհ են դարձել, քանի որ, ինչպես

84 «Հայերեն ձեռագրերի հիշատակարաններ. ԺԵ. դար», մասն Գ. (1481-1500 թթ.), կազմեց՝ Խաչիկյան Լ., Եր., 1967, էջ 354, N 473: Հմմտ. Մույնի հատ. Ա., էջ 301, N 314:

85 «Ժամանակագրական մանր հատվածներ», «Մանր ժամանակագրություններ», հատ. Բ., էջ 528:

86 «Նամակ Ալեքսանդրապոլից», «Մշակ», 1872, 27 յուլիսի, N 29, էջ 3:

87 Տես Աբրահամյան Հ., մշվ. աշխ., էջ 108:

88 «Հայերեն ձեռագրերի հիշատակարաններ. ԺԵ. դար», մասն Ա. (1601-1620 թթ.), կազմեցին՝ Հակոբյան Վ., Հովհաննիսյան Ա., Եր., 1974, էջ 8, N 8:

89 «Հայերեն ձեռագրերի հիշատակարաններ. ԺԴ. դար», մասն Ա. (1301-1325 թթ.), կազմողներ՝ Խաչիկյան Լ., Մաթևոսյան Ա., Ղազարոսյան Ա., Եր., 2018, էջ 261, N 242: Հմմտ. Հարությունյան Խ., Հայերեն ձեռագրերի հիշատակարանները, Եր., 2019, էջ 290-291:

90 Նույն տեղերում:

տեսանք, բնության աղետները, որպես կանոն, ուղեկցվել են հացի սղությամբ, սովով ու համաճարակներով:

Հետաքրքիր է, որ տարմահավերի՝ մորելիսներին ոչնչացնելու առաքելությունն արտացոլվել է նաև ժողովրդական ավանդության մեջ: Հ. Ղևոնդ Ալիշանի և մի շարք այլ տեղագիր-ուսումնասիրողների (Հ. Թաթարյան, Մ. Սմբատյանց, Ս. Զելինսկի, Մ. Վազներ, Ի. Բերեզին, Գ. Ղափանցյան և այլք) հաղորդմամբ՝ Մասիսի ստորոտին գտնվող Ակոռիի Ս. Հակոբավանքի աղբյուրի ջուրը հայտնի էր «մարախահար» անդաստանները բժշկելու գործությամբ, ինչով պայմանավորված՝ ուխտավորներն աղբյուրից ջուր էին տանում հեռավոր գավառներ, «ուր հարուածք մարախոյ լինէին, և սփռէին յանդաստանս. և անդէն իջանէին մարախակորոյս տարմահաւք՝ վարդագոյն և սպիտակաթիկունք (Sturnus roseus). ի ռամկաց կոչեցեալ Ս. Յակոբայ դուշ (թոչուն)»⁹¹: Տեղեկություն կա նույնիսկ այն մասին, որ Կիարոսի Հակոբ թագավորը 1473 թ. երկու հայ է ուղարկել Ս. Հակոբավանքի աղբյուրը՝ իր երկրի համար «մարախահալած» ջուր տանելու⁹²:

Ակոռիի 1840 թ. երկրաշարժի և Երևանը 1848 թ. պատուհասած մորելիսների աղետի վկայությամբ մի ուշագրավ վիմագիր է պահպանվել ՀՀ Կոտայքի մարզի Կամարիս գյուղի Ս. Հակոբ եկեղեցու հյուսիսային մուտքի աջակողմյան հատվածում (նկ. 11ա, բ):



ԿՈՐԶԱՆՈՒՄՆ
ՍԱՆՈՒԻ 1840
ՄՈՐԵԽԵՂԱԽԵՐԷԻ
ԱՆ 1848ԷՐ

Նկ. 11ա, բ. Ակոռիի երկրաշարժի և Երևանի մորելիսների աղետի մասին վկայող վիմագիրը. 1848 թ.

(լսնկ. և գրչ.՝ Ա. Հարությունյանի, 2022 թ.)

ԿՈՐԶԱՆՈՒՄՆ / ԱՎՈՌԻ, 1840: /
ՄՈՐԵԽԵ ԵԿԱԻ ԵՐԷԻ/ԱՆ, 1848 ԷՐ⁹³:

91 Ալիշան Ղ., Այրարատ. բնաշխարհի Հայաստանեայց, Վենետիկ, 1890, էջ 470: Հմմտ. Սիմոնյան Լ., Ս. Հակոբ Մծբնա հայրապետի հիշատակը հայոց մեջ, Եր., 2022, էջ 82-84:

92 Տե՛ս Ալիշան Ղ., նշվ. աշխ., էջ 470:

93 Սիմոնյան Լ., նշվ. աշխ., էջ 89:

Տեղին է նկատել վիմագրագետ Սուրեն Սաղումյանը՝ նշելով, որ Ակոռիի երկրաշարժը «այնպես խոր նստեց մարդկանց գիտակցության մեջ, որ Կումարիսի (Գյամրեզ) եռանավ բազիլիկի հյուսիսային որմին ևս հիշատակագրվեց այս դժխեմ եղելությունը»⁹⁴: Չմոռանալով, որ Ակոռիի երկրաշարժը հիշատակված էր նաև Մայակովսկի (Շահապ) գյուղի եկեղեցու վիմագրերից մեկում:

Ս. Էջմիածնի միաբան Մեսրոպ արք. Սմբատյանցը Երևանը, Վաղարշապատը և հարակից այլ բնակավայրեր երաշտից զերծ պահելու հավատով 1870 թ. ուխտագնացության է մեկնել Ս. Հակոբավանք՝ աղբյուրից ջուր բերելու, անդաստանի կարգ անելու նպատակով: Ուխտագնացությունը նկարագրելիս Սմբատյանցը նշում է, որ ականատես է եղել դեռևս 1847 թ. և հետագա տարիներին գրանցված թրթուրների, մորեխների տարածման և նման այլ աղետաբեր երևույթների, որոնք կանխվել են Ս. Հակոբավանքի աղբյուրի սուրբ ջրով. «...վասն զի մարախի տարածման միջոցին՝ երբ այն սուրբ ջրէն տանին ուր և իցէ, [գալիս են – Ա. Հ.] ահագին բազմութեամբ թռչնոց երամբ, որոց տեսակն առ հասարակ Հայաստանի մէջ՝ «Ս. Յակոբայ դուշ» անուանեն...»⁹⁵: Անշուշտ, վերոնշյալ վիմագիրը Սմբատյանցի հիշատակած մորեխների տարածման երևույթի քարեղեն ապացույցն է:

Հիշյալ վիմագրին ժամանակամերձ մի հիշատակություն էլ Ս. Հակունին է ավանդում, ըստ որի՝ 1849 թ. Իգդիրից ոչ հեռու՝ Կուլար գյուղում, մորեխների սաստիկ հարձակում է եղել, որը «...ամբողջ արտերն ոչնչացուցած է. ամպի նման երկինք պատած և արեգական լոյսն խաւարեցուցած է: «Սուրբ Յակովբայ սարեկն» եկած՝ սպառած է ամբողջ մարախն»⁹⁶:

Մորեխների բազմությունն աղոթքով ոչնչացնելու մասին է վկայում նաև **Բերդի Ս. Սարգսի խաչ կոչվող գերեզմանոցի** տապանագրերից մեկը, որը ժամանակին գրի է առել ազգագրագետ Դերենիկ Վարդումյանը (նկ. 12): Վերծանությունը ներկայացնում ենք ըստ նրա դաշտային օրագրի:

94 Սաղումյան Ս., «Շարժ եղել», «Հուշարձան» տարեգիրք, հատ. Բ., Եր., 1993, էջ 4:

95 Մեսրոպ վրդ. Սմբատեանց, Սուրբ Յակոբայ ջուր, «Արարատ», Ս. Էջմիածին, 1870, N Զ., էջ 193: Հմմտ. Միմոնյան Լ., նշվ. աշխ., էջ 82-83:

96 Հակունի Ս., նշվ. աշխ., էջ 363:

ԱՅԼԵ ՏԱՊԱԷ ՍՐԵԼԱԿՈՆ ՏՏԻՐ ԱՆԱԷԿՅ ԲԷՇԻՐ ՏՏԻՐ-
ՍՈՒՔԻԱՍՍԱՆ ՌՒՆԵՐՈՒՆԸ ԻՌՈՒՄ ԱՆՈՐԱԻԲ ԵՄԱԿ
ՍՈՒՐԵԼԵ ՅԵՏ ԴԱՅՐՈՒՑ ԱՅՍ ԳԱՒԱՌԻ ԶԱԵԴԵՐԻՑ:

150 ԹԱԼԱՅ ԶԱԱԿՈՒՄ ՎԻՃԻՆ 1845 ԱՐ 5 Է ԱՊՐԻԼԻ
ԴԱՆԴՆՅԻՆ ՏԱՊԱՆ ԻՐ ԹՈՈՒՐ ՄԼՏԻՐՈՍ ԱՎՔ
ՍԱԷՐ ԵՒ ՔԻՒԴՈՇ ԻՐԵԱՅ ՊԱՌՆ ԶԻՇՎԱՅ 18 1/2 ԳԼ

**Նկ. 12. Տեր Անանիա քահանայի տապանագրի ընդօրինակությունը
(Դ. Վարդումյանի դաշտային օրագրից, 1958 թ.)**

Տապանաքարի հյուսիսային նիստին՝ 3 տող.

ԱՅՍ Է ՏԱՊԱՆ ՍՐԲԱԿՐԹՆ ՏԷՐ ԱՆԱՆԻԱՅ ՔԱՂԱՅՆԱՅԻ ՏԷՐ- /
ՍՈՒՔԻԱՍԵԱՆ, ՈՐ Ի ԾԵՐՈՒԼԹԵԼԱՆՆ ԻՒՐՈՒՄ ԱՂՕԹԻԻՔ ԵԿԵԱԼ
/ ՄՈՒՐԵԽՆ ՅԵՏ ԴԱՐՅՐՈՒՅ ԱՅՍ ԳԱԻԱՌԻ ՅԱՆԴԵՐԻՅ:

Հարավային նիստին՝ 3 տող.


150 ԱՄԱՅ ՀԱՍԱԿՈՒՄ ՎԼԻՍՏԱՆԵՅԼԱԿԻ 1845 ԱՄԻ, 5-Ն ԱՊՐԻԼԻԻ
/ ԳԱՆԳՆԵՅԻՆ ՏԱՊԱՆՍ ԻՐԻ ԹՈՌՆԵՐ՝ ՄԱՐՏԻՐՈՍ,
ԱԼԵԲ/ՍԱՆԴՐ ԵՒ ՓՐԻԴՈՆԸ ԻՐԻՆԱՆՑ ՊԱՊԻՆ ՅԻՇԱՏԼԱԿ,
15.1.1891⁹⁷:

Ընդօրինակությունից դատելով՝ տապանաքարն օրորոցաձև է, և արձանագիր են երկու լայն նիստերը: Ննջեցյալը Անանիա քահանա Տեր-Սուքիասյանն է, որը վախճանվել է զառամյալ տարիքում (թերևս վրիպակ կամ չափազանցություն է 150 տարի ապրած լինելը)՝ 1845 թ. ապրիլի 5-ին, իսկ նրա տապանաքարը կանգնեցվել է ավելի ուշ՝ 1891 թ. հունվարի 15-ին, թոռների՝ Մարտիրոսի, Ալեքսանդրի և Փիրիդոնի կողմից: Տարիներ են անցել, բայց սրբակրոն քահանան սերունդների հիշողության մեջ մնացել է իր հրաշագործ աղոթքներով, որոնց զորությամբ հետ է մղել անգամ գավառի հանդերր պատուհասած մորեխներին (վիճագրում՝ մուրեխ):

Ամփոփելուց առաջ ներկայացնենք երկրաշարժի վկայությամբ
ևս երկու վիճակ, որոնք դուրս են մնացել հողվածաշարի առաջին
մասից: Դրանցից մեկը հայտնաբերվել է 1988 թ. հնագետ Հայկ
Եսայանի ղեկավարած **Տավուշ ամրոցի Ս. Աստվածածին եկեղե-**

97 **Վարդույան Ղ.**, Բերդ. տապանագրեր (1958 թ. սեպտեմբեր), ՀԱԻ արխիվ, Ղ. Վարդույանի ֆոնդ, գ. 150:

ցու պեղումների ժամանակ: Հնգատող վիմագիրը, որը, ըստ ամենայնի, վերծանել է վիմագրագետ Սուրեն Սաղումյանը, ներկայումս ցուցադրվում է Բերդի պատմության և կենցաղի թանգարանում (նկ. 13ա, բ):



Նկ. 13ա, բ. Գանձակի երկրաշարժի վկայությամբ վիմագիրը. 1141=1139 թ. (լսնկ.՝ Տ. Ալեքսանյանի, 2021 թ., գրչ.՝ Ա. Հարությունյանի, 2022 թ.)

**Ի :ՃԻ: (120) ԹՈՒՈՆ ՃԵՏ՝ (՞) ՇԻՆՈՒԹԵԱՆ ԵԿԵՂԵՑՈՅՍ / ԻՍԿ Ի
:ՇՂ: (1141=1139) ԲԱՐԿՈՒԹԻԼԻՆ ՀԱՍԵ՛ԱՂ ԱՍՏՈՒԾՈՅ ԵՒ
ԸԶՏԻԵԶԵՐ/ԱՀՈՉԱԿ ՔԱՂԱՔՆ ԳԱՆՁԱԿ ԿՈՐԾԱՆԵԱՅ: ԵՄ՝ ԱԲԱ՛ՍՂ,
/ ՈՐԴԻ ԿԼԻԻՐԻԿԷԻ ԱՐՔԱԻ, ՆՈՐՈԳԵՑԻ ՎԵՐՍՏ՛ԻՆ
ԶԱՍՏՈՒԱԾԱԾԻՆՍ / ՅԻՇԱՏԱԿ ՀՈԳՈ ԻՄՈ ԵՒ ԵՂԲ՛ԱԽԻ ԻՄՈ
՛ԳՂԱԽԹԻ ԵՒ ...⁹⁸:**

Վիմագրի վերջում առնվազն երկու տառ եղծված է, սակայն դա չի խանգարում բովանդակության ամբողջացմանը: Հստակ է, որ վիմագիրը բնութթով շինարարական է, որում տեղեկություններ են հաղորդվում Գանձակի ավերիչ երկրաշարժի և դրա հետևանքով

⁹⁸ Եսայան Հ., Սաղումյան Ս., Շահնազարյան Ա., Տավուշ ամրոցի պեղումները, «Լրաբեր» հաս. գիտ., 1991, N 2, էջ 137:

խոնարհված Տավուշ ամրոցի Ս. Աստվածածին եկեղեցու՝ Կյուրիկե արքայի որդի Աբասի կողմից նորոգման մասին: Հետաքրքրական է, որ վիմագրի սկզբում նշվում է, որ կառուցումից ձի, այսինքն՝ 120 տարի հետո է եկեղեցին խոնարհվել Գանձակի ավերիչ երկրաշարժից, իսկ աղետի տարեթիվ է նշվում ՇՂ թվականը, այն դեպքում, երբ մատենագիրները (Մխիթար Գոշ⁹⁹, Սամուել Անեցի¹⁰⁰, Կիրակոս Գանձակեցի¹⁰¹, Իբն ալ-Ասիր¹⁰² և այլք) հիշատակում են հիմնականում ՇՁԸ (1139), Ստեփանոս Օրբելյանը՝ ՇՁԷ (1138)¹⁰³, և միայն Մխիթար Այրիվանեցին՝ ՇՂ (1141)¹⁰⁴ թվականը: Վիմագրի առաջին հրատարակիչներն անդրադարձել են այս խնդրին, հղել երկրաշարժի առնչությամբ հայ և օտարազգի մատենագիրների վկայությունները և եկել այն համոզման, որ վկայված ՇՂ թվականի վերծանության համար տրամաբանորեն պիտի հաշվել ոչ թե հայոց, այլ քրիստոնեական թվականով, որը սկիզբ է առնում ներկա թվականից երկու տարի առաջ, այսինքն՝ հայ տոմարագետները հիմք են ընդունել ոչ թե Քրիստոսի ծննդյան 1 թ., այլ մ.թ.ա. 2 թ., և այս դեպքում է, որ գործում է հայոց մեծ և քրիստոնեական թվականների զուգահեռության ոչ թե 551, այլ 553 գումարման սկզբունքը¹⁰⁵: Այսու, վիմագրում վկայված ՇՂ տարեթիվն իրականում հաշվված է քրիստոնեական թվականով, որից հանելով ավելդիր երկու տարին՝ կստանանք 1139 թվականը¹⁰⁶: Մեզ տարակուսելի է թվում վիմագրի երկրորդ տողի սկզբում ընթերցված «ԱԿԻ» բառը, որը, ուսումնասիրողների մեկնաբանմամբ, «տարեսկիզբ» է նշանակում¹⁰⁷: Մենք վերընթերցել ենք «ԻՄԿ Ի» (թվացյալ Ա-ի փոքր ստեղծը իրականում քարի կոտրվածք է), իսկ առաջին տողի «ԹՈՒՈՒՆ»-ից հետո հավանական

99 Տե՛ս **Մխիթար Գոշ**, Ժամանակագրություն, «Մատենագիրք Հայոց», հատ. Ի., ԺԲ. դար, գիրք Բ., էջ 607:

100 Տե՛ս **Սամուել Անեցի եւ Հարունակողներ**, Ժամանակագրություն. Աղամից մինչեւ 1776 թ., աշխատասիրությամբ **Կ. Մաթևոսյանի**, Եր., 2014, էջ 212-213:

101 Տե՛ս **Կիրակոս Գանձակեցի**, նշվ. աշխ., էջ 117, 200:

102 Տե՛ս **Իբն ալ-Ասիր**, Լիակատար պատմություն (Ալ-Քամիլ ֆի-լ-Տարիխ), թարգմանություն բնագրից, առաջաբան և ծանոթագրություններ՝ **Ա. Տեր-Ղևոնդյանի**, «Օտար աղբյուրները Հայաստանի և հայերի մասին», հատ. 11, Եր., 1981, էջ 250:

103 Տե՛ս **Ստեփանոս Օրբելյան**, Պատմություն նահանգին Սիսական, Թիֆլիս, 1910, էջ 340-341:

104 Տե՛ս **Մխիթարայ Այրիվանեցու** Պատմություն ժամանակագրական, ի լոյս ընծայեաց **Ք. Պլատկանեան**, Ս. Պետերբուրգ, 1867, էջ 78:

105 Տե՛ս **Աբրահամյան Ա.**, Հայոց գիր և գրչություն, Եր., 1973, էջ 110:



106 Տե՛ս **Եսայան Հ., Սաղումյան Ս., Շահնազարյան Ա.**, նշվ. աշխ., էջ 140:

107 Տե՛ս նույն տեղում:

ենք համարում «ՅԵՏ» բառը, որն իմաստային առումով ևս կապակից է բնագրին:

Այսպիսով՝ գրչի բնորոշմամբ «տիեզերահռչակ» Գանձակ քաղաքի երկրաշարժի մասին եղած մատենագրական աղբյուրները լրացնելու է գալիս նաև յուրօրինակ թվագրմամբ վիմագիրը, որն ուղղակիորեն հաղորդում է նաև երկրաշարժի ընդգրկման սահմանների, հասցրած վնասների, տվյալ դեպքում՝ Տավուշ ամրոցի Ս. Աստվածածին եկեղեցու (ըստ վիմագրի՝ կառուցվել էր երկրաշարժից դեռևս 120 տարի առաջ, այսինքն՝ 1019 թ.¹⁰⁸) խոնարհման մասին: Վիմագրի վերջում վկայված է նաև Աբասի եղբոր՝ Մածնաբերդում իշխող Դավիթ Կյուրիկյանի անունը, որի և Աբասի հիշատակի համար էլ կազմվել է մեզ հասած վիմական վկայագիրը:

Երկրաշարժի վկայությամբ երկրորդ վիմագիրը **Անտիոքի մերձակա Ռուձի հովտի Գնիե գյուղից** է, որի արևելյան կողմում է գտնվում Շեյխ Իսա կոչվող հին աղբյուրը՝ նորոգման մասին վկայող տարածամանակյա երեք վիմագրերով (նկ. 14ա, բ): Դրանցից վաղագույնը կրում է Հիջրի 1238, Փրկչական 1822 թվականը և հայտնում աղբյուրի վնասվելու հիմնական պատճառը, որը 1822 թ. մեծ երկրաշարժն է՝ առավել հայտնի «Հալեպի երկրաշարժ» անունով:



Նկ. 14ա, բ. Գնիե գյուղի հին աղբյուրի նորոգման վիմագիրը. 1822 թ. (լսնկ.՝ Հ. Չոլաքյանի, 2006 թ., գրչ.՝ Ա. Հարությունյանի, 2023 թ.)

**ԹԻԻ ՇԱ/ՐԺԻՆ / ՀԻԽՃՐԻԻ 1238 (1822): / ԵՂԵԻ ՊԱՏՃԱՌ /
ՆՈՐՈԳՄԱՆ ԱՂԲԻ/ՐՈՍ
ՇԷԻՆ ԻՍԱՆ / ԱՐԴԻԱՄԲ ՏԷՐ ՕՎԱՆՆԷ/ՍԻՆ....¹⁰⁹:**

108 Տես նույն տեղում, էջ 141:

109 **Չոլաքյան Յ.**, Անտիոքի մերձակայ Ռուձի հովտի հայերը (պատմա-ազգագրական ուսումնասիրություն), Անթիլիաս, 2006, էջ 100-101:

Ավելի ուշ՝ 1863 թ., աղբյուրը վերստին նորոգվել է Օվաննես քահանայի որդու՝ տեր Ակոբի միջոցներով (մինչ այդ նորոգվել էր նաև 1832 թ.), ինչի ամփոփումը ևս վիճակագիր է կազմվել. «Վերստին նորոգեցաւ աղբիւրս արդեամբ Տէր Օհաննէսին որդի Տէր Ակոբին, հիճրի 1280 (1863)»¹¹⁰: 1932 թ. գյուղապետ Շեխ Ույեսի նախաձեռնությամբ ավելի ցածրադիր նոր աղբյուր է կառուցվել, իսկ հինը պարսպապատվել է, արձանագիր քարերն էլ ագուցվել են ավազանի որմերին՝ իրար կից¹¹¹:

Անշուշտ, դիտարկվող երևույթների մասին պահպանված վիճակագրերը վերոբերյալ օրինակներով բնավ սպառված համարվել չեն կարող: Այդուհանդերձ, ներկայացված նյութն էլ բավարար է ընդհանուր գաղափար կազմելու բովանդակային առումով յուրատեսակ վիճակագրերի ու դրանցում ամփոփված երևույթների մասին: Երկրաշարժերի, Արեգակի խավարման, ծովի ալեկոծման, երաշտի ու մորեխի մասին վկայող վիճակագիր հուշարձաններն ականա պարզում են նաև աղետների հետևանքները. երկրաշարժի դեպքում՝ զոհեր, ավերածություններ, հուշարձանի ի նորո կառուցում կամ նորոգում, նոր շինություններով համալրում, ծովի ալեկոծման դեպքում՝ նավաբեկություն ու ջրահեղձում, իսկ երաշտի ու մորեխների ակտիվացման երևույթն ուղեկցվել է հացամթերքի սղությամբ, սաստիկ թանկությամբ ու սովով, որոնք էական նշանակություն ունեն հատկապես ժողովրդագրական գործընթացների ժամանակագրությունը հստակեցնելու տեսանկյունից:

Ստորև տրվում է վերոբերյալ հիշատակություններն ամփոփող աղյուսակը:

Հ/հ	Երևույթը	Տեղը	Ժամանակը	Աղբյուրը
1	Ահեղ օրեր	ՀՀ Տավուշի մարզ, գ. Այգեձոր, խաչքար	11-12-րդ դդ.	Բարխուդարեանց, 1999, 327. Ղաֆաղարյան, 2007, 301. Զանգլյան, 2011, 31. Շահինյան, 1984, 63.
2	Երկրաշարժ	ՀՀ Տավուշի մարզ, Բերդի	1141=1139 թ.	Եսայան, Սաղունյան,

¹¹⁰ Նույն տեղում, էջ 101:

¹¹¹ Տե՛ս նույն տեղում, էջ 100:

		պատմության և կենցաղի թանգարան		Շահնազարյան, 1991, 137.
3	Երկրաշարժ	Անտիոքի մերձակա Ռուձի հովիտ, գ. Գնիե	1822 թ.	Չոլաքեան, 2006, 100–101.
4	Երաշտ (°)	ՀՀ Շիրակի մարզ, գ. Բարձրաշեն, Ս. Աստվածածին եկեղեցի	13-րդ դ. առաջին կես	ԴՀՎ/10, 30/30. Ավագյան, 1986, 161–162.
5	Երաշտ	Վրաստանի Քվեմո Բարթևի տարածաշրջան, Էնագերթի և Արդիսուբանի գյուղերի միջև	1455 թ.	Ըստ Ն. Իվանովի տրամադրած լուսանկարի
6	Երաշտ	Բզնունիք, Արծկե գավառամաս, գ. Առնջկուս	1515 թ.	Կարապետյան, 2017, 75.
7	Մարախ (մորելա)	Արցախ, Մարտունու շրջան, գ. Հերիեր, Ս. Գրիգորիս եկեղեցի	1673 թ.	ԴՀՎ/5, 165/571.
8	Մորելա	ՀՀ Տավուշի մարզ, ք. Բերդ, «Ս. Սարգսի խաչ» գերեզմանոց	1845 թ.	Վարդումյան, 1958, գ. 150.
9	Մորելա	ՀՀ Կոտայքի մարզ, գ. Կամարիս, Ս. Հակոբ եկեղեցի	1848 թ.	Սիմոնյան, 2022, 89.
10	Մորելա	Երնջակ գավառ, գ. Զուղա, Ս. Գևորգ եկեղեցի	1867 թ.	Ավագյան, 2004, 155/1037.
11	Ցորենի թանկություն	ՀՀ Սյունիքի մարզ, գ. Տաթև, աղբյուրի շենք	1745 թ.	ԴՀՎ/2, 34/65.
12	Հացի թանկություն	ՀՀ Սյունիքի մարզ, ք. Ագարակ (ծագման վայրը՝ գ. Վահրավար), սալաքար	1880 թ.	Մանուչարյան, 1996, 51. Աբրահամյան, 2022, 45.

13	Ցորենի, գարու, խոտի ու դարմանի թանկություն	ՀՀ Գեղարքունիքի մարզ, գ. Զոլաքար, Զոլախաչի թիկունքին	1880 թ.	Մանուշարյան, 1996, 52.
14	Ցորենի թանկություն	ԱՀ Ասկերանի շրջան, գ. Շոշ, Ս. Աստվածածին եկեղեցի	1918 թ.	անտիպ
15	Սով, հացի ու հավկիթի թանկություն	ՀՀ Կոտայքի մարզ, գ. Զառ, Ժայռաբեկորի վրա	1922 թ.	անտիպ

Արսեն Է. Հարությունյան – գիտական հետաքրքրությունների շրջանակն ընդգրկում է հայկական վիմագրությունն ու ձեռագրագիտությունը: Ինը գրքի և ութ տասնյակից ավելի գիտական հոդվածների հեղինակ է:

Էլ. հասցե՝ ars.vimagraget@gmail.com

Summary

THE NATURAL DISASTERS AND THE HEAVENLY PHENOMENA IN EPIGRAPHS

Part II: Drought, Locust swarm

Arsen E. Harutyunyan

Candidate of Sciences in History

Keywords – epigraph, drought, ritual, cult, locust, and shortage of bread, price increase in wheat and millet, war, earthquake, famine, church, khachkar (cross-stone).

Numerous evidences about weather anomalies and climate changes, especially intense heat, water scarcity, seed drying, locust and larva activation, as well as about drought have been preserved in colophons of the Armenian manuscripts, chronicles, as well as in ethnographic materials and folklore, which are reflected in epigraphic monuments too. In fact, in order to prevent drought people often performed the rain-related and hay land rituals, erected monuments, sacrificed animals etc. Usually, the drought was

Վէմ համահայկական հանդես, ԺԵ (ԻԱ) տարի, թիվ 1 (81), հունվար-մարտ, 2023

accompanied by shortage of bread, famine and epidemics. Some interesting epigraphs dated back to the 19-20th centuries known from Zolakar, Agarak (originally from Vahravar village), Shosh, Zar and one's preserved on the khachkar (12-13th cc.) located Aygedzor village not far from "Aghjkaberd" castle, the inscription of which testifies to difficulty bring the monument, to bless it solemnly and to the erection in intercession to Christ for the terrible days.

The phenomenon of activation of locust is also should be considered as a consequence of the drought, when the hay lands and orchards were attacked by locusts for days, sometimes for years and the whole crop was destroyed. From this perspective the epigraph from St. Gevord church of Jugha village dated back to 1867 was remarkable. According to inscription, in order to prevent locust attack people prayed, offered liturgies, sacrificed animals, and blessed hay lands. After that by the grace of God, the birds saved the hay lands from disaster during three days. According to the same epigraph, the activation of locusts caused shortage and increase of bread price, as the wheat became two manat and the millet one and a half manat.

Резюме

СТИХИЙНЫЕ БЕДСТВИЯ И НЕБЕСНЫЕ ЯВЛЕНИЯ В ЭПИГРАФИЧЕСКИХ НАДПИСЯХ

Часть 3. Засуха, саранча

Арсен Э. Арутюнян

Канд. ист. наук

Ключевые слова – эпитафическая надпись, засуха, ритуал, поклонение, саранча, нехватка хлеба, дороговизна пшеницы и проса, война, землетрясение, голод, церковь, хачкар (крест-камень).

В памятных записях и летописях армянских рукописей, как и в этнографических и фольклорных материалах, сохранилось множество свидетельств о климатических аномалиях, природно-климатических

изменениях, особенно, о сильной жаре, нехватке воды, высыхании семян, активизации саранчи и гусениц, о засухе. Подобные свидетельства отражены также в эпиграфических памятниках. Чтобы предотвратить засуху, люди часто устраивали ритуалы вызывания дождя, сооружали монументы, совершали жертвоприношения и обряд «Андастан». Обычно длительная засуха сопровождалась нехваткой хлеба, голодом и эпидемиями. Известно несколько примечательных свидетельств, датированных XIX-XX вв., из Золакара, Агарака (изначально из села Вахравар), Шоша, Зара, в которых говорится об этих явлениях. А эпиграфические надписи на хачкаре (крест-камень) XII-XIII вв., расположенном на краю крепости «Ахджжаберд», недалеко от Айгедзора, гласят о том, с каким трудом был привезен камень для монумента, как он был торжественно освящен и возведен, чтобы в грозные дни просить Христа о помощи.

Последствием засухи следует считать и активизацию саранчи, когда поля и сады в течение многих дней, даже лет, подвергались нашествиям саранчи, и весь урожай уничтожался. С этой точки зрения заслуживает внимания пространная эпиграфическая надпись 1867 г. на стене бывшей церкви Св. Геворга в селе Джуга, согласно которой люди для предотвращения нашествия саранчи молились, совершали литургию, жертвоприношения, обряд «Андастан», после чего, по милости Божьей, птицы за три дня спасли поля и предотвратили катастрофу. Из этой же надписи можно узнать, что вследствие активизации саранчи возникла нехватка хлеба и дороговизна, пшеница стала стоить две монеты, а просо – полторы монеты.

REFERENCES

1. [Shahinyan A.,] Hayastani mijnadaryan kot'oghayin hushardzannerē. IX-XIII dareri khach'k'arerē, Yer., 1984 (In Armenian).
2. "Divan hay vimagrut'yan", prak II. Gorisi, Sisiani yev Ghap'ani shrjanner, kazmets'' Barkhudaryan S., Yer., 1960 (In Armenian).
3. "Divan hay vimagrut'yan", prak V. Arts'akh, kazmets'' Barkhudaryan S., Yer., 1982 (In Armenian).
4. "Divan hay vimagrut'yan", prak X. Shiraki marz, kazmets'' Barkhudaryan S., pat. khmb.' Sargsyan G., Harut'yunyan A., Yer., 2017 (In Armenian).
5. "Hay hmayakan yev zhoghovrdakan aghot'k'ner", ashkhatut'yamb' S. Harut'yunyan, Yer., 2006 (In Armenian).

6. “Hayeren dzeragreri hishatakaranner. ZHD. dar”, masn A. (1301-1325 t‘t.), kazmoghnner’ **Khach’ikyan L., Mat’evosyan A., Ghazarosyan A.**, Yer., 2018 **(In Armenian)**.
7. “Hayeren dzeragreri hishatakaranner. ZHĒ. dar”, masn A (1601-1620 t‘t.), kazmets’in’ **Hakobyan V., Hovhannisyan A.**, Yer., 1974, masn B (1621-1640 t‘t.), kazmets’in’ **Hakobyan V., Hovhannisyan A.**, Yer., 1978 **(In Armenian)**.
8. “Hayeren dzeragreri hishatakaranner. ZHYE. dar”, masn A. (1401-1450 t‘t.), kazmets’ **Khach’ikyan L.**, Yer., 1955, masn G. (1481-1500 t‘t.), kazmets’ **Khach’ikyan L.**, Yer., 1967 **(In Armenian)**.
9. “Hayots’ patmut’yun”, hat. III. Nor zhamanakashrjan (XVII dari yerkrord kes – 1918 t‘.), girk’ arajin (XVII dari yerkrord kes – XIX dari verj), khmb.’ **Melk’onyan A. yev urishner**, Yer., 2010 **(In Armenian)**.
10. “Manr zhamanakagrut’yunner. XIII-XVIII dd.”, hat. I, kazmets’ **Hakobyan V.**, Yer., 1951, hat. II, kazmets’ **Hakobyan V.**, Yer., 1956 **(In Armenian)**.
11. “Mayr Mashtots’”, hat. A., girk’ A., ěst hnagoyn yerkat’agir dzeragreri yew hamematut’eamb Astuatsashunch’ mateani, bnagrakan yew kanonats’ankayin yaweluatsovk’, ashkhatasirut’eamb’ **G. Tĕr-Vardaneani**, S. Ėjmiatsin, 2012 **(In Armenian)**.
12. “Mshak”, T’iflis, 1872, 27 yulisi, N 29, 1880, 4 (16) aprili, N 57, 1880, 5 (17) marti, N 35, 1882, 8 (20) aprili, N 58, 1883, 14 septemberi, N 129, 1895, 28 yunvari, N 11, 1916, 21 yunvari, N 13 **(In Armenian)**.
13. **Abrahamyan A.**, Hayots’ gir yev grch’ut’yun, Yer., 1973 **(In Armenian)**.
14. **Abrahamyan Ė.**, Sovi vkayut’yunĕ Vahravari vimagrerrits’ mekum, “Vardzk’”, Yer., 2022, N 17, ěj 44-45 **(In Armenian)**.
15. **Abrahamyan H.**, Gyumru “Yot’ Verk’” srbapatkeri patmut’yunĕ, “Ėjmiatsin”, S. Ėjmiatsin, 2017, N B, ěj 90-115 **(In Armenian)**.
16. **Alishan Gh.**, Ayarat. bnashkharh Hayastaneayts’, Venetik, 1890 **(In Armenian)**.
17. **Alishan Gh.**, Sisakan. teghagrut’iwn Siwneats’ ashkharhi, Venetik, 1893 **(In Armenian)**.
18. **Aĕak’el Dawrizhets’i**, Girk’ patmut’eants’, ashkhatasirut’yamb’ **L. Khanlaryani**, Yer., 1990 **(In Armenian)**.
19. **Avagyan S.**, Vimakan ardzanagrut’yunneri barak’nnut’yun, Yer., 1986 **(In Armenian)**.
20. **Ayvazyan A.**, Nakhijevani vimagrakan zharangut’yunĕ, hat. A. Jugha, Yer., 2004 **(In Armenian)**.
21. **Barkhudareants’ Makar yeps.**, Aghuanits’ yerkir yew drats’ik’. Arts’akh, Yer., 1999 **(In Armenian)**.
22. **Barkhudaryan S.**, Sots’ial-tntesakan bovandakut’yan ardzanagrut’yunner yev ditoghut’yunner, “Ėjer hay zhoghovrdi patmut’yan yev banasirut’yan” (hodvatsneri zhoghovatsu), pat. khmb.’ **Barkhudaryan V., Hakobyan V.**, Yer., 1971, ěj 73-95 **(In Armenian)**.
23. **Bdoyan V.**, Yerkragortsakan mshakuytĕ Hayastanum, Yer., 1972 **(In Armenian)**.
24. **Ch’anglyan I.**, Shamshadin. patmakan teghekut’yunner, Yer., 2011 **(In Armenian)**.
25. **Ch’olak’ean Y.**, Antiok’i merdzakay Ruchi hoviti hayerĕ (patma-azagrakan usumnasirut’iwn), Ant’iliyas, 2006 **(In Armenian)**.
26. **Gasparyan G., Grigoryan A., Hakobyan A. yev urishner**, Hayots’ lezvi barbarayin bararan, hat. B. (Ė-TS), Yer., 2002 **(In Armenian)**.
27. **Ghafadaryan K.**, Shamshadini 1935 t’vi hnagitakan gitarshavĕ, “Ėjer hayots’ mijnadaryan mshakuyt’i yev patmut’yan”, hat. 5, Yer., 2007, ěj 231-332 **(In Armenian)**.
28. **Ghanalanyan A.**, Avandapatum, Yer., 1969 **(In Armenian)**.

29. **Grigoryan A.**, Artakarg iravichaknerë yev chgnazhamayin karavarman mijots'arunnerë mijin darerum, "Chgnazhamayin karavarum yev teknologianer" gitakan yev gitamet'odakan hodvatsneri zhoghovatsu, hat. 13, Yer., 2018, ëj 238-244 (**In Armenian**).
30. **Harut'yunyan A.**, Petrosakhach'i norahayt ardzanagrut'yunë, "Ejmiatsin", S. Ejmiatsin, 2018, N T', ëj 80-87 (**In Armenian**).
31. **Harut'yunyan A.**, Sovi vkayut'yunnerë ZHĖ. daraskzbi matenagrakan aghbyurnerum, "Banber Matenadarani", Yer., 2021, N 32, ëj 224-233 (**In Armenian**).
32. **Harut'yunyan A.**, Tarerayin aghetnern u yerknayin yerevuyt'nerë vimagrurum: Mas arajin: Yerkrasharzh, "Vëm", Yer., 2022, N 1, ëj 178-196, Mas yerkrord: Aregaki khavarum, tsovi alekotsum, "Vëm", 2022, N 3, ëj 168-196 (**In Armenian**).
33. **Harut'yunyan A.**, Vagharshapat. vank'erë yev vimakan ardzanagrut'yunnerë, S. Ejmiatsin, 2016 (**In Armenian**).
34. **Harut'yunyan Kh.**, Hayeren dzerageri hishatakarannerë, Yer., 2019 (**In Armenian**).
35. **Haykuni S.**, Bagrewand. Jrabashkh gawar, masn A., Ejmiatsin, 1894 (**In Armenian**).
36. **Hayrapetyan T'.**, Andzrevaber yev andzrevakhap'an tseseri yerkhakadir ênkalumneri shurj, "Patmabanasirakan handes", Yer., 2004, N 3, ëj 217-227 (**In Armenian**).
37. **Hovsep'yan R., Abrahamyan H.**, "Kat'navov matagh" andzrevaber yev andzrevakhap'an tses Syunik'um, "Lraber" has. git., Yer., 2022, N 3, ëj 349-366 (**In Armenian**).
38. **Hovsep'yan R.**, Hayastani yezdineri "Buka barane" ("andzrevi hars") yev myus andzrevaber tseserë, "Ejmiatsin", S. Ejmiatsin, 2017, N A., ëj 114-146 (**In Armenian**).
39. **Ibn al-Asir**, Liakatar patmut'yun (Al-K'amil fi-l-Tarikh), targmanut'yun bnagrits', arajaban yev tsanot'agrut'yunner' **A. Ter-Ghevondyani**, "Ôtar aghbyurnerë Hayastani yev hayeri masin", hat. 11, Yer., 1981 (**In Armenian**).
40. **K'ajberuni**, Chanaparhordakan nkatoghut'yunner, hratarakut'yan patrastets'in' **K'alant'aryan A., Sargsyan G., Melk'onian H.**, Yer., 2003 (**In Armenian**).
41. **Karapetyan S.**, Hayastani patmut'yun, hat. G. Artske, Yer., 2017 (**In Armenian**).
42. **Kirakos Gandzakets'i**, Patmut'yun Hayots', ashkhatakirut'yamb' **K. Melik'-Ôhanjanyani**, Yer., 1961 (**In Armenian**).
43. **Lalayan Ye.**, Yerker, hat. 3, pat. khmb.' **Vardumyan D.**, Yer., 2004 (**In Armenian**).
44. **Lalayean Ye.**, Nor-Bayazëti gawar. Jri pashtamunk', "Azgagrakan handës", girk' XVII, T'iflis, 1908, ëj 86-87 (**In Armenian**).
45. **Lisits'yan St.**, Zangezuri hayerë, Yer., 1969 (**In Armenian**).
46. **Malkhasyan M.**, Zhoghovrdagrakan gortsënt'ats'nerë Hayastanum 16-rd darum – 17-rd dari arajin kesin, Yer., 2020 (**In Armenian**).
47. **Malkhaseants' St.**, Hayerën bats'atrakan bařaran, hat. 2, Yer., 1944, hat. 3, Yer., 1944, hat. 4, Yer., 1945 (**In Armenian**).
48. **Manuch'aryan A.**, Hats'i t'ankut'yan vimagir hishatakut'yunner Meghru yev Martunu shrjannerum, "Hayastani Hanrapetut'yunum 1993-1995 t't'. hnagitakan hetazotut'yunneri ardyunk'nerin nvirvats 10-rd gitakan nstashrjan", zekuts'umneri t'ezer, Yer., 1996, ëj 51-52 (**In Armenian**).
49. **Melik'-P'ashayan K.**, Anahit dits'uhu pashtamunk'ë, Yer., 1963 (**In Armenian**).
50. **Minasean M.**, Tër P'ilipos (P'ilippë) T'ek'irtaghts'i u ir tagherë, "Haykazean hayagitakan handës", hat. LA., Pëyrut', 2011, ëj 471-488 (**In Armenian**).
51. **Minasyan T'.**, Utik'i grch'ut'yan kentronnerë, Yer., 2020 (**In Armenian**).
52. **Mkhit'ar Gosh**, Ařakk', ashkhatakirut'eamb' **Ė. Piwazeani**, arajabanë' **Ö. Vardazareani**, "Matenagirk' Hayots'", hat. I. ZHB. dar, girk' B., Yer., 2014, ëj 15-106 (**In Armenian**).

53. **Mkhit'ar Gosh**, Zhamanakagrut'iwn, "Matenagirk' Hayots'", hat. I. ZHB. dar, girk' B., Yer., 2014, ėj 605-612 (**In Armenian**).
54. **Mkhit'aray Ayrvanets'woy** Patmut'iwn zhamanakagrakan, i loys ėntsayeats' **K'. P[atkanean]**, S. Peterburg, 1867 (**In Armenian**).
55. **Mkrtch'yan S.**, Toner. Haykakan zhoghovrdakan tseser, sovoruyt'ner, havatalik'ner (avanduyt' yev ardiakanut'yun), Yer., 2010 (**In Armenian**).
56. **Nersēs Shnorhali**, Hanelukner, arajabanē yev k'nnakan bnagirē` **A. Mnats'akanyani**, "Matenagirk' Hayots'", hat. IA., girk' A., Yer., 2018, ėj 1219-1323 (**In Armenian**).
57. **Nersēs Shnorhali**, Nerboghean kensatu surb khach'in ar i srboy hawrēn mermē Dawt'ē asats'eal, arajabanē yev k'nnakan bnagirē` **A. Melk'oneani**, "Matenagirk' Hayots'", hat. IA., girk' A., Yer., 2018, ėj 537-558 (**In Armenian**).
58. **Nersēs Shnorhali**, Voghb Yedesioy, arajabanē yew k'nnakan bnagirē` **P. Khach'atreani** yew **M. Mkrtch'eani**, "Matenagirk' Hayots'", hat. IA., girk' A., Yer., 2018, ėj 141-205 (**In Armenian**).
59. **Örbēlean S.**, Patmut'iwn nahangin Sisakan, T'iflis, 1910 (**In Armenian**).
60. **Petrosyan H.**, Khach'k'ar. tsagumč, gortsaruyt'č, patkeragrut'yunč, imastabanut'yunč, Yer., 2008 (**In Armenian**).
61. **Saghumyan S.**, "Sharzh yeghew", "Hushardzan" taregirk', hat. B., Yer., 1993, ėj 3-9 (**In Armenian**).
62. **Samuēl Anets'i yew sharunakoghner**, Zhamanakagrut'iwn. Adamits' minch'ew 1776 t'., ashkhataširut'yamb' **K. Mat'evosyani**, Yer., 2014 (**In Armenian**).
63. **Sargsyan G.**, Morekhneri arshavank'nerē, "Artakarg t'ert'", Yer., 2004, N 9, 10 (**In Armenian**).
64. **Sedrakean Aristakēs vrd.**, Hnut'iwnk' hayreneats' i gawařin Yernjaku, Vagharshapat, 1872 (**In Armenian**).
65. **Simonyan L.**, S. Hakob Mtsbna hayrapeti hishatakē hayots' mej, Yer., 2022 (**In Armenian**).
66. **Smbateants' Mesrovb vrd.**, Surb Yakobay jur, "Ararat", S. Ėjmiatsin, 1870, N Z., ėj 189-195 (**In Armenian**).
67. **Srvandztyants' G.**, Grots' u brots', "Yerker", hat. 1, Yer., 1978 (**In Armenian**).
68. **Tēr-Dawt'eants' Dawit' vrd. Ulnets'i**, Storagrut'iwn ayts'elut'ean, "Arshaloys Araratean", Zmiwřnia, 1867, 27 yunisi, N 808 (**In Armenian**).
69. **Vardumyan D.**, Berd. tapanagrer (1958 t'., september), HAI arkhiv, D. Vardumyani fond, g. 150 (**In Armenian**).
70. **Yesayan H.**, **Saghumyan S.**, **Shahnazaryan A.**, Tavush amrots'i peghumnerč, "Lraber" has. git., 1991, N 2, ėj 132-141 (**In Armenian**).